

東

華

錄

東華錄

臣周滄蕃恭校

秋七月丙辰諭禮部 昭西陵帷幄用金黃色 孝東陵帷幄用

明黃色 陵寢神龕寶座供奉之物理應同色但供奉多年不敢

輕易更換之時著俱用明黃色○丁巳諭內閣頃岳鍾琪奏稱四

川成都府城中有一男子沿街叫喊說岳鍾琪帶領川陝兵馬欲

行造反其人已披提督黃廷桂拏獲臣不便檄訊又不敢隱匿等

語數年以來在朕前讒譖岳鍾琪者甚多不但謗書一篋而已甚

至有謂岳鍾琪係岳飛之後伊意欲修宋金之報復者其荒唐悖

謬至於此極岳鍾琪懋著功勳朕故任以西陲要地付以川陝重

兵而檢險奸邪之徒造作蜚語煽惑人心謾毀大臣其罪可勝誅

乎此成都造言之人斷非出於無因或蔡珽程如絲輩懷挾私怨暗中指使或再有播弄之人均未可定著交與黃炳黃廷桂會同嚴審此事關係誣謗國家大臣重案非民間誣告比也至於川陝兵民向來醇良忠厚且受 聖祖仁皇帝六十餘年深仁厚澤淪肌浹髓朕卽位以來又屢加恩澤伊等至誠感激西省數年用兵軍民人人踊躍急公其尊君親上之習實眾所共知其聞者今奸民乃云欲從岳鍾琪謀反是不但誣岳鍾琪一人而並誣川陝兵民以叛逆之罪矣黃炳等務將實情審明具奏○戊午吏部議奏工部尙書李永紹辦理殿試桌椅遲延復捏奏已經收貯應請革職得旨朕卽位時間李永紹居官聲名不好是以調任盛京工部侍郎令其效力贖罪伊在奉天實能洗心改過聲名甚優故擢用工部尙書乃伊自任尙書以來並不實心效力所辦事務舛錯謬

妄如 昭西陵碑文鐫字及恭建 聖祖仁皇帝聖德碑關繫

祖宗重大典禮伊皆因循怠忽又如製造戰船火礮器械行文錯
誤修理大城牆垣故意遲延其他交部議處之案甚多今此備造
殿試桌椅一事明係有意欺隱姑念其年老效力多年從寬免其
革職著降三級休致○河道總督齊蘇勒稽曾筠奏報伏汛安瀾
得旨疏內稱頌之語俱有洪福齊天河伯效靈字樣朕敬 天祀

神至誠至恪如齊天字樣實爲越理卽效靈字樣朕覽之心亦不
安嗣後內外臣工本章內將此等祝頌之語通行禁止○己未調
署兵部尙書辦理刑部尙書事黃國材爲工部尙書○壬戌諭吏
部八旗恩廕本具奏完日將降授三品廕生之公侯伯及官員等
傳集宣諭曰爾等見今職分應得一二品廕生因爾等平日爵高
祿重並無效法祖父圖報國家之心亦不以文學武藝訓教子弟

徒恃父祖舊勞累世榮顯凡遇公事因循怠忽規避不前所以將爾等子弟降授三品廕生且爾等子弟年俱幼穉若得一品二品廕生當卽以員外郎主事補用補官之後才質庸碌不能辦理部務徒被參革亦屬可憫今暫給三品廕生正欲使伊等勉力學習若果勤謹自立學習成材之日爾等本身卽可懇恩具奏朕固樂於加恩若爾等子弟內誠有才質英俊可膺一品二品廕生之任者爾等今日卽可陳奏朕亦樂於加恩仍賜以一品二品廕生○刑部侍郎黃炳等審奏程如絲在夔州知府任內販賣私鹽重賄蔡珽依勢橫行殺傷多人殘忍已極蔡珽身任巡撫利欲薰心袒護保舉程如絲爲四川第一好官負恩罔上俱應擬斬立決得旨此案內程如絲所差巡兵甚多黃炳未曾詳究又據程如絲自認販賣私鹽四萬餘包而蔡珽推爲不知程如絲私販之事焉有私

鹽至四萬餘包之多而蔡珽不知之理黃炳亦未將此處究問且所審喬鐸隱匿夔關稅銀一案佛喜通同作弊之處本內亦未置議黃炳辦理此事甚屬不及但程如絲蔡珽已擬立斬罪無可加而案內牽連各犯多人一加駁詰又至遷延拖累是以交與法司議結將來黃炳尙有另行差委之處儻似此草率審理定行嚴加議處佛喜負恩作姦著將伊布政使任內錢糧事件速令交代清楚拏解來京質審○署福建巡撫毛文銓參奏汀漳道劉燦揭報漳州府知府耿國祚龍溪令魏彪倉庫相近彼此那移耿國祚詳揭劉燦縱容家人書役等索詐銀兩互相揭告俱請解任質審得旨朕看劉燦爲人麤鹵不識大體則有之若貪贓枉法之事可以料其必無聞伊到任後揭報屬員虧空被人將伊揭帖藏匿伊心憤激於眾人前以首觸牆旋即具詳辭官因士民多人環繞攀留

而止今毛文銓所參道府互揭一案其過自在耿國祚魏彪著將
耿國祚魏彪解任質審劉燦仍著在任質審俱交與楊文乾常賚
審明定擬○賑陝西固原州水災饑民○予故理藩院額外侍郎
兼副都統本錫祭一次○癸亥兵部議准雲貴總督鄂爾泰奏雲
南鎮沅府附近之威遠係新闢地方而普洱乃沅江府舊屬流官
所轄皆須設兵彈壓應令普洱參將帶兵五百名移駐威遠威遠
守備帶兵三百名移駐普洱又鎮沅府內通哀牢四面夷獠茶山
地勢狹隘不能安設多兵應令茶山守備帶兵三百名移駐鎮沅
茶山設千總一員帶兵二百名防守者樂近於鎮沅界接景東應
令把總一員帶兵一百名駐防其餘汎地仍令原設千把帶兵防
守總屬於普威營參將仍令臨元總兵官副將統轄則聲勢聯絡
呼應得靈矣從之○甲子諭大學士等七月初一日朕曾頒諭旨

云從來天人感召之理捷於影響凡地方水旱災祲皆由人事所致或朝廷政事有所闕失或督撫大吏不修其職或郡縣守令不得其人又或一鄉一邑之中人心詐僞風俗澆漓此數端者皆足以干天和而召災祲是以朕諄諄訓飭頒發諭旨至再至三而宵旰之時無刻不深乾惕但天下至大兆民至眾察吏之責莫如督撫親民之官莫如守令若地方有司官果能視民如子休戚相關平時化導有方桐瘰一體則民氣舒暢而乖戾潛消設偶遇雨暘愆期又復爲民請命虔誠祈禱自可挽回天意感召休和如張堪之麥秀兩岐魯恭之蝗不入境史冊所傳皆實有其事實有其理非虛語也近見有司官平時不能盡愛養之道民生不厚民俗不醇既足上干天譴及遇水旱又漠不關心不知悔過自省縱事祈禱虛文不過勉強塞責甚至不肖之員惟恐報災蠲賦己身不得

火耗羨餘而隱匿不報者有之又或本身原有虧空轉冀水旱得
邀賑以便開銷而百姓並不沾顆粒之惠者有之似此居心行事
竟將民生疾苦視同陌路則民氣鬱而不舒何以弭天災而召豐
穰乎朕爲天下主凡民生之休戚吏治之得失皆朕躬之責亦難
推諉於臣工況臣工之是非卽朕之是非朕又何能推諉乎但用
人察吏之道各有等次朕所察用者督撫也督撫所察用者有司
也若督撫不得其人朕之過也有司不得其人則督撫之過也至
地方百姓不能爲之遂生復性捍患禦災則其過專在有司矣夫
爲政之道在於得人而用人之法止得博採輿論然使但以輿論
爲憑則如裴率度張楷人皆稱其秉公持正謹慎和平及至近日
江西虧空畢露弊端種種皆裴率度張楷任內之事至如河南巡
撫田文鏡者尙有李紱謝濟世等誣爲貪婪如此不辨公私顛倒

是非之事不可枚舉則輿論既不足盡憑人之賢否何由而知是以試用之以觀其後卽古聖人明試以功之意試之而稱其職豈非朕心之所樂願試之而不稱其職自當速行更換豈有劣員既經敗露尙可姑留在任乎乃無知小人不知朕進退人才之苦心而輒有輕於去留之私議此則愚昧之甚者也爲督撫者當體朕察吏安民之苦心竭誠秉公倡率百僚使地方有司皆能實盡父母斯民之道則上與下合爲一心官與民聯爲一體和氣致祥休嘉日集斷不至旱潦之爲憂矣今年春月直隸地方有數處少雨朕心軫念不遑甯處降旨詢問而總督宜兆熊劉師恕坦然奏稱今年閏月嗣後得雨亦不爲遲朕已降旨切責如此存心怠忽豈能感召天和從前雍正二年春河南地方少雨田文鏡具摺奏聞朕覽奏爲之心動竭誠祈禱乃伊摺奏到京之二日河南卽得大

兩自後三年之內豫省皆獲豐收連歲穀秀十三穗麥秀三歧可見至誠感格無有不應凡封疆大臣皆能如此存心則地方斷無不受福之理田文鏡當加殊恩以示嘉獎著加兵部尚書銜授爲河南總督總兵以下聽其節制此係特恩不爲豫省定例朕意各省地方莫要於水旱之事當定爲地方官之考成除直隸之玉田寶坻等處江南之泗州盱眙等處湖廣之江陵沔陽等處廣東之圍基等處皆濱江近河素稱沮洳之地似此等地方難以定議外其餘地方官員儻有政治不修化導不力以致民氣不舒災祲見告者或有自顧己私匿災不報者應作何嚴加處分之處著大學士九卿詳議具奏如此則人人知敬天勤民之道矣自古有治人無治法朕所降諭旨丁寧往復無非念切民生然必奉行盡善方收實效卽如社倉一事朕數年以來屢屢降旨但可勸民自爲不

可繩以官法前楊宗仁在湖廣銳於舉行而州縣官迎合其意勉強行之近日竟有官吏將此項米穀侵那者此卽奉行社倉之弊非朕之意也又如民間向來多將膏腴之壤栽種煙葉以圖重利朕慮其拋荒農務諭令有司善爲勸導使知務本諭旨甚明並非迫令一時改業也今聞有將民間已種之煙葉竟行拔去此時旣不能樹藝五穀而已種之物又復棄置豈不農末兩失大負朕愛養百姓之初心耶朕所降諭旨明白周詳而奉行者如此舛錯皆係愚劣官員不能領會且遠鄉僻壤之地未曾曉諭周知此皆地方大吏疏忽之咎著將此諭旨徧傳直省務使遠鄉僻壤咸共知之此乃初一日所降諭旨也乃數日以來陰雨連綿不見晴霽朕甚憂畏虔誠修省細思近日用人行政之處可以自信或因前日頒發諭旨欲將地方水旱定爲有司考成之處其事有所不可故

上天垂象以示意耶其以水旱爲考成之處不必定例大學士九卿不必議奏著將前後所降諭旨彙寫一處仍復通行並令大小官員各錄一道存貯官署以自儆省且使知朕敬天乾惕之至意期與內外大小臣工勉之其餘仍照前旨行○乙丑上以陰雨連綿在圓明園齋戒虔禱雨中步行數里詣恩佑寺禱於聖祖仁皇帝御容前是日雨勢稍止夜分而霽翼日大晴○命直省建龍神廟○丙寅刑部議奏山西猗氏縣姦民令狐士義因受塞思黑資給還鄉志存叛逆挾稟遠赴西甯語多狂悖合依大逆律凌遲處死得旨令狐士義著立斬梟示○發帑金六萬兩賑直隸濱河州縣水災饑民○己巳綽奇緣事革職以夸岱爲工部尙書仍兼內大臣行走○癸酉諭禮部朕惟孔子以天縱之至德集羣聖之大成堯舜禹湯文武相傳之道具於經籍者賴孔子纂述修

明之而魯論一書尤切於人生日用之實使萬世之倫紀以明萬世之名分以辨萬世之人心以正風俗以端若無孔子之教則人將忽於天秩天敘之經昧於民彝物則之理勢必以小加大以少陵長以賤妨貴尊卑倒置上下無等干名犯分越禮悖義所謂君不君臣不臣父不父子不子雖有粟吾得而食諸其爲世道人心之害尙可勝言哉惟有孔子之教而人道之大經彝倫之至理昭然如日月之麗天江河之行地歷世愈久其道彌彰統智愚賢不肖之儔無有能越其範圍者綱維旣立而人無踰閑蕩檢之事在君上尤受其益易曰君子以辨上下定民志禮運曰禮達而分定使非孔子立教垂訓則上下何以辨禮制何以達此孔子所以治萬世之天下而爲生民以來所未有也使爲君者不知尊崇孔子亦何以建極於上而表正萬邦乎人第知孔子之教在明倫紀辨

名分正人心端風俗亦知倫紀既明名分既辨人心既正風俗既端而受其益者之尤在君上也哉朕故表而出之以見孔子之道

之大而孔子之功之隆也○以阿克敦署廣東巡撫

由兵部左侍郎署

○

西藏噶隆扎薩克台吉頗羅鼐等奏報康濟鼐與準噶爾搆兵所辦諸事洵有裨益乃阿爾布巴隆布柰扎爾鼐等會同前藏頭目於六月十八日將康濟鼐殺害臣卽收聚後藏軍兵防守駐紮阿爾布巴等復發兵來侵被臣殺傷無算今臣帶領兵眾勦捕阿爾布巴等伏祈 皇上速遣官兵進藏勦滅逆魁以安西藏奏入報聞○革哲先任以法保爲工部右侍郎

由郎中遷

○丙子晉封輔國公

弘暉鄂齊熙良俱爲鎮國公○解高其佩任命在都統行走以單

騎書爲刑部右侍郎

由大理寺卿遷

○以赫勝額爲貴州按察使

由員外郎遷

○戊寅原任江西巡撫伊都立緣事革職發往鄂爾昆圖拉地方

代亨特辦理種地事務效力贖罪○己卯刑部等衙門議覆康親王等參奏蘇努於 聖祖仁皇帝硃批諭旨狂書塗抹悖逆已極應將伊子孫照叛逆例悉行正法得旨朕從前在藩邸時與蘇努並無絲毫嫌怨止因蘇努爲人陰險姦邪爲惡黨之首引誘宗親要結匪類欲以擾亂政事煽惑人心其害關於宗社誠爲元惡渠魁舉朝所共知者朕卽位後冀其改過自新封爲貝勒厚加恩眷而伊並不感恩悔罪仍復怙惡不悛又見朕防範嚴密伊不得遂結黨之私復教導其諸子肆行不法甚至蘇爾金庫爾陳烏爾臣信從西洋外國之教朕屢次降旨諭令悛改伊竟公然抗違奏稱願甘正法不肯改易似此忘本背君藐視國法喪心蔑理聞者莫不駭異今查出昔年 聖祖仁皇帝硃批奏摺蘇努竟於 御筆中間狂書塗抹見者無不心寒髮指是其背叛之心顯然昭著罪

實同於大逆本應將伊子孫照法司所議俱行正法但伊子孫多至四十人若悉行正法朕心有所不忍儻分別存留於法又覺未協今從寬暫免其死仍照前禁錮著將蘇努父子前後所犯罪案及朕所降諭旨徧行曉諭伊之子孫若嗣後伊等安靜守法再無過犯則開恩全其性命儻諸人中有一人犯法者不論情罪之輕重定照此議將伊卽行正法○庚辰以安陸荊州等府水災命修隄墜以工代賑○賑江南無爲舒城等六州縣水災饑民○辛巳吏部議准雲貴總督鄂爾泰奏東川一府地方遼闊實非一知府一經歷所能徧理查巧家營偏近烏蒙去府甚遠應立一縣設知縣一員管轄馬書弩革米糧壩以扯汎等處者海地方素通烏蒙暗行不法應設典史一員管轄革舍阿固伙紅等處駐紮者海其歹補地方離府百里山深箐險應設巡檢一員管轄五龍畢七法

夏等處又則補地方遠在江外亦應設巡檢一員管轄阿木可徂
普毛杉木箐等處至東川府敎職諸事向係知府兼攝請添設敎
授一員專司學校歲取文武童生各十名從之尋定巧家營新設
縣曰會澤○壬午諭內閣法敏從司官之職朕加特恩用至倉場
侍郎歷任巡撫乃伊深負朕恩一味沽名釣譽苟且因循朕屢加
訓誨而伊全然不知悛改卽如南坪冕山之苗蠻等肆行不法騷
擾居民搶奪行旅爲地方之患久矣岳鍾琪方議用兵剿撫以爲
除暴安民之計而法敏密摺奏稱近邊員弁僥倖軍功議敘遂生
喜功好事之心或致激成事端等語此時朕見其奏猶以爲此庸
人迂闊之見或道聽塗說之言而不識安邊經國之遠圖是以詳
悉批示冀其醒悟今岳鍾琪料理南坪冕山等處苗蠻之事迅速
成功永除地方之累而法敏與佛喜程如絲喬鐸等通同作弊之

處一一敗露可知法敏從前之奏實與蔡珽佛喜程如絲暗結黨
援欲以傾陷岳鍾琪而阻撓國家之政事並非迂闊之見出於無
心者也其護庇屬下貪官隱匿夔關稅課乃伊營私作弊之一節
耳負國負恩莫此爲甚法敏著革職拏問將伊所奏原摺發出交
九卿嚴審定擬○大學士九卿等奏順天府恭進藉田所產嘉穀
一莖雙穗五本一莖三穗至四穗五穗十二本一莖六穗至七穗
八穗十四本一莖九穗二本一莖十穗至十一穗十二穗六本一
莖十三穗二本又內務府恭進豐澤園 皇上親植稻穀雙穗者
二百七十本三穗者十五本四穗者一本臣等欣逢嘉瑞請宣付
史館俾垂永久報聞○癸未諭直省總督巡撫等自雍正二年以
來朕躬耕藉田而藉田之中每歲必產嘉穀上年自雙穗至於九
穗今歲則自雙穗至於十三穗在廷諸臣及京師耆庶皆驚訝以

爲奇朕之宣示於眾者並非矜詡誇張以爲祥瑞蓋實有見於天
人感召之理捷於影響而朕敬天之心至誠至切願與內外大
小臣工共勉之也稼穡爲天地之寶民命攸關我聖祖仁皇帝
臨御六十餘年無刻不以重農力穡爲先務仰觀天時俯察地利
辨土性而課人功咨雨暘而防旱潦綢繆區畫旣食宵衣偶遇雨
澤愆期聖心憂勞之切侍側臣子皆惶悚不甯所以爲萬世謀
粒食者至矣盡矣朕朝夕瞻仰者四十餘年今纘承大統竭誠效
法念切民依每年虔祀先農躬耕帝藉仰蒙上天眷佑疊錫
嘉禾是以特頒諭旨令各省守土官共舉耕藉之禮爲萬方百姓
祈禱秋成今見各省督撫奏報處處風雨均調春麥秋禾並登豐
稔雖邊遠荒僻之地亦慶有秋惟直隸湖廣安徽數州縣近水最
低之處常年被潦者畧有浸注亦不爲災是今歲可稱大有年矣

良由各省初耕藉田各該有司自然小心敬慎齋戒虔誠是以感格上蒼而獲此盈甯之錫儻從此益加敬謹不懈初心則歲歲屢豐可以豫必爾督撫等可通行曉諭所屬官民當懷帝鑒之匪遙勿視耕藉爲故事永矢嚴恪以迓天和天下臣民受福斯朕之福也

八月甲申朔諭刑部李茂卿打死胡君彩之案若非爾部駁令覆審則兇犯李茂卿脫然無罪而屍親胡君星反坐以誣告擬流不惟是非失實亦且冤抑莫伸矣今駁回覆審該撫將一切實情審出李茂卿擬絞監候方成信案似此定彙司官若不量加獎勵則將來實心辦事之員何由鼓舞嗣後此等事件爾部司員苟能細心究覈駁令覆審改正妥協者應量加議敘以示獎勵若有將應照覆完結之案妄行苛駁徒滋弊端者亦當加以懲戒○刑部議

准雲南巡撫楊名時奏姚安府土同知高厚德占奪民田欺隱莊地請革其世職遷其家口於省城改派流官從之○乙酉工部議奏部統盧詢等監修昭西陵工程辦理不慎應分別處分得旨前據盧詢奏稱修工時值雨水連縣甃塊被溼以致入冬冰凍將甃塊擠出周圍裂墜石角磕損等語陵工關係重大白應敬謹修理今盧詢等以冬寒冰凍爲詞當時未凍之先何不速行完工及至冰凍之時又不據實奏聞請旨明係草率怠忽甚屬可惡著將盧詢鈕倫革職令來保動支正項錢糧交與盧詢等速行修理仍著來保監督如果工程堅固完好屆期三年該部奏聞將盧詢鈕倫免其治罪若三年之內有些微損裂之處卽將盧詢鈕倫正法○議政王大臣等議覆川陝總督岳鍾琪奏西甯北川口外大通川白塔川及野馬川之側爾兔地方城垣營房漸次告竣應

設官兵豫爲酌派查肅州鎮屬永固城等營涼州鎮屬永昌等營
向因偏鄰邊境設馬六步四或馬步各半今大通鎮營扼險拒要
肅州口外又設安西重鎮表壯聲威則永固等營皆屬內地應將
肅州涼州二鎮所屬永固永昌等十八營馬兵量裁九百六十名
連甯夏鎮標後營近已裁去馬兵六百名共裁馬兵一千五百六
十名大通鎮有控制援勦之責應照馬步各半之例設馬兵一千
名步兵一千名側爾免遊擊偏近邊境路通青海應設馬兵三百
二十名步兵四百八十名白塔川參將與西甯北川營相去止五
十里距大通鎮不過一百餘里聲氣響應設馬兵二百四十名
步兵五百六十名得旨西大通等處初設兵丁甚屬緊要其應添
設參將遊擊守備千總等官著岳鍾琪於陝西武官內應題補者
題補應調補者具題調補○丁亥調史貽直爲戶部左侍郎吳士

玉爲工部左侍郎○己丑 上御經筵○領侍衛內大臣公馬爾賽等奏原任將軍那里德統率軍營在軍前勒索蒙古銀兩駝馬縱容家人包攬捐納冒銷錢糧入己巴達色鑽營諂媚認伊爲父卽將巴達色題補筆帖式並代其捐升主事那里德婪贓不法本應正法因已故無庸議其家產應入官巴達色應斬監候不准援赦寬免得旨此本內將巴達色等議以不得援赦寬免者原爲兵餉事務關繫重大之故但本內並未聲明嗣後凡有軍機兵餉之事俱不應援赦寬免著永爲定例○署直隸總督宜兆熊等奏大城縣知縣李先枝貪婪成性罔念民瘼將地畝人丁於額徵之外加派私收苦累小民請革職究審得旨李紱任直隸總督時將李先枝題升天津州知州朕調來引見看其人甚屬庸常故令仍回知縣原任今以私派被參劣款見有明據常見科甲出身人員多

有黃緣黨庇之惡習而貪贓枉法者尙不多見今李先枝目無國法公然私派科歛苦累小民實爲科目中之匪類而李紱乃敢在朕前特薦題補天津要缺是李紱不但有心袒護且必有暗受李先枝請託之處著將李先枝革職鞫問其私派情由及本內有名人犯該督等一併嚴審定擬再將如何請託李紱之處務須究出具奏李紱受朕深恩不思報效敢於營私欺罔甚屬可惡著將李紱革職其工部侍郎員缺著申大成補授仍兼管順天府府尹事前因廣西貴州查勘疆界及擒拏羅文剛二案將李紱發往廣西彼時降旨若不能拏獲羅文剛卽將李紱在廣西正法今羅文剛已經緝獲是李紱在廣西無可辦理著行文令李紱來京見在應行質問之案件甚多且李紱曾在朕前奏稱蔡珽爲人粗疏鹵莽則有之若貪婪不法之事臣可以保其必無今蔡珽諸事敗露在

四川任內受賄貪賊劣蹟昭著李紱敢於庇護私黨在朕前妄奏
此處亦應審問○添設湖南糧道庫大使一裁衡陽縣松柏市巡
檢一○庚寅命江南附近商竈地方設倉六所貯穀備賑○協理
禮部尙書法海緣事革職○賴都休致以常壽爲禮部尙書調西
琳爲戶部左侍郎以張保爲刑部右侍郎仍署西安巡撫○調富
貴爲雲南布政使以鳴爾泰署江南安徽布政使由兩淮鹽政署○乙未
戶部議准署廣西巡撫甘汝來奏思恩府屬之西隆州西林縣僻
處西北距府千里之外界接滇黔獐獍頑梗知府耳目難周請改
西隆州爲直隸州西林縣距州百四十里可以就近分歸管轄從
之○工部等衙門議准川陝總督岳鍾琪遵旨查覆四川永甯協
副將張瑛條奏內酌議可行者四款一四川松潘鎮爲川西屏障
城堡損壞不足以壯聲威而資防禦請委員確估修築完固一雲

南東川府會理州貴州威甯府屬之阿底鹽倉等處永甯之各夷屯歸流已久其土目各治其民流官向土目收糧終非久計請將土目遷往腹地其催糧之里屯甲首令內地輪流充當其土民悉令薙髮男婦俱照內地服飾一貴州威甯府屬之永甯縣去府千里駐紮衙署乃與四川之敘永同知共在永甯而所屬人民散處於四川江安納溪興義等縣且無貴州營汛而以四川永甯協營弁代爲稽查奸良莫辨請將永甯縣改歸四川隸於同城之敘永同知管轄一東川府土人習讀蠻書不諳文藝請設立義學俟教化有成照湖廣考取苗獠童生例另編字號酌量進取以示鼓舞從之○丙申吏部等衙門議奏見任官員職守地方各有專責不得借終養之名諉卸職任卽或父母衰疾迎養維艱陳情詳請必愿俸三年該督撫查明該員政務竝無怠忽倉穀錢糧竝無虧空

取結具題照例准其終養或從前家有次丁出仕之後兄弟物故
父母無人奉事者該督撫取具原籍地方官印結具題不拘年限
准其回籍從之○丁酉吏部議准署廣西巡撫甘汝來奏太平府
屬之思明州向隸思明土府同知自改土爲流始歸太平府管轄
止留吏目一員仍駐其地該州地處極邊鄰近交趾土民獷悍非
吏目所能約束太平知府遠在百里之外鞭長莫及請將該州仍
歸附近之思明土府同知管轄從之○己亥廣東總督孔毓珣奏
臣由曲阜縣路經江南鳳陽府屬之宿州及靈璧縣地方溝洫不
通雨水停積訪之土人宿州之水有流入新河者有流入運河者
有流入滄河者其靈璧縣之水悉入滄河而匯於洪澤湖出清口
合黃水入海請敕安徽撫臣令該地方官照舊溝深淺用力疏濬
則雨水暢流可無停蓄之患得旨凡爲大臣者當視國事如家事

卽非己身管轄之地有所見聞亦據實陳奏方爲公忠之道孔毓
珣經過宿州靈璧地方見溝洫不通雨水停積卽行奏聞甚屬可
嘉著交部議敘魏廷珍身爲巡撫於本省事務漫不關心以致低
窪之處被水停注甚屬疏忽玩著交部嚴察議奏孔毓珣所奏
著交與總督范時繹轉交署布政使噶爾泰確查被水之民加恩
賑恤並將應行疏濬之水道相度修治使積水暢流不爲民害○
裁陝西洮陽驛永昌驛古浪驛南大通驛西甯驛嘉順驛巴古驛
王鉉驛大壩驛驛丞九增寬溝驛三眼井驛營盤水驛驛丞三○
庚子諭大學士九卿等天下庶務殷繁斷非一人所能辦理朕宵
旰勤勞勵精圖治而分猷贊理之任實於爾諸大臣是賴爲大臣
者必須視國事如家事方可謂之公忠不負朕股肱心膂之寄如
爾等自理家務必商酌盡善措置得宜斷無漫然爲之聽其錯誤

不爲釐正之理至於教導家人約束奴僕其分別優劣賞罰寬嚴之間爾等亦斷無率意而行之事而獨至於辦理公事之時類多苟且塞責漫不經心或隨眾畫題畫行而於其中之原委曲折茫然不知或心知其不可而瞻顧不肯直言以爲非我一人之事不如隨班逐隊以免是非至於接待屬員如同僚友平時不辨別其是非不督責其過失及至甄別之際又復瞻徇情面曲直不分種種陋習皆部院大臣所不能免古人云公爾忘私國爾忘家言人臣既以身許國卽當置家事於不問也今縱不能如古人之體國奉公忘私忘家亦安可視國事家事截然分爲兩途而輕重疏密其相去若是之遠哉庸臣具臣之習切宜深戒朕日以良臣名臣之道期望大臣爾等慎勿菲薄自待重負朕期望之心至於諸臣存心之誠僞朕觀其陳奏之言辦理之事卽可洞悉其隱微或改

變初心或屏除舊習朕一見無不知之不可不自勉也夫人臣之弊莫大於迎合上意此朕所深惡而日加訓誡者朕欲大小臣工俱爲好官爾等若欲迎合朕意何不卽以勉爲好官爲迎合之首務則朕之心慰爾等亦無負於朕矣○癸卯諭大學士等 皇祖妣 皇妣外家俱有世襲公爵 孝誠仁皇后外家之公爵因常泰獲罪奉 皇考諭旨革退而彼時未令承襲者 皇考或有深意存焉今可著常海之子倫布承襲再原任都統賴塔當三逆變亂時伊統兵征勦克復雲南功績懋著朕恭閱 聖祖仁皇帝實錄備悉其詳因伊身有過犯其功過適足以相抵是以未封公爵給以阿思哈尼哈番在國法實爲允當且當日之不優封賴塔者欲使立功之人咸知儆惕收歛不可恃功驕肆妄爲今事歷多年後人已知鑒戒奉法著將賴塔追封爲一等公令伊孫博爾屯承

襲以示朕眷念舊臣之至意○諭內閣積善由刑部司官朕加恩擢至江西按察使准其具摺奏事伊自應勉竭忠誠凡有所見據實奏聞乃自到任以後諸凡事務一槩隱匿並不陳奏值邁柱到任之時亦當將地方事務一一告知同心協辦以報朕格外擢用之恩乃反袒護裴律度等徇庇屬員邀結黨與捏造無稽之談誣參邁柱邁柱到任以來不避嫌怨爲地方生民計實心效力天下共知伊縱不竭誠協助邁柱辦理又何忍誣陷邁柱此等行事是何肺腸聽誰指使積善向爲刑部司官塞爾圖若非黨與何故將如此不肖之人保舉著富甯安查郎阿會同刑部堂官訊問積善務將始末緣由審出若不實供卽嚴加刑訊○吏部議准雲貴總督鄂爾泰奏廣西貴州交界地方犬牙相錯惟紅水一江天之所以限黔粵也議以紅水江爲界江以南屬之廣西江以北屬之貴

州凡廣西西隆州所屬羅煩冊亨等四甲及泗城府所屬上江長
壩桑郎羅斛等十六甲俱在江北應請割隸貴州其地南北約三
百里東西徑六七百里勢既遼闊民復兇悍請於泗城對江之長
壩地方建設州治添知州一吏目一學正一管理之東北羅斛四
甲與貴州定番永甯二州相連土苗兇頑山谿尤險請於羅斛甲
地方設州判一分理之西隆州所割四甲距長壩寫遠請於冊亨
甲地方設州同一分理之其武弁亦屬緊要請設城守遊擊一千
總一兵二百五十名防守長壩地方守備一把總一兵一百五十
名防守冊亨甲地方把總一兵一百名防守羅斛甲地方俱歸安
籠鎮統轄至泗城之北有一肩作山爲黔粵分界黔屬之董家旗
等十寨穿入泗城請將此十寨俱歸新設之州管理再安順一府
原轄三州五縣南籠一廳地方廣闊再轄新設州地數百里勢難

兼顧請將南籠廳改爲府治添設知府一經歷一仍留南籠通判爲之佐理將安順府所屬之普安一州安南普安二縣併新設一州俱歸南籠府管轄其鎮甯永甯二州普定安平清鎮三縣請仍歸安順府管轄又普安州之捧鮓地方有養馬箐穿連三十餘里爲三江咽喉夷獍之要隘上江白雲壘險峻異常惟一徑迂回攀援而上法巖寨山高十五里路險巖危歪染寨煙戶百餘家田多民富若於捧鮓地方設立一營白雲壘之上撥員弁帶兵扼險法巖歪染二處設立大汛防守不惟黔夷可以控制卽粵獍亦不敢起釁查黃草壩在捧鮓之內請卽以駐防黃草壩之安籠鎮標左營遊擊一千總一把總一兵三百名移駐捧鮓將原防捧鮓汛之把總一兵五十名移駐黃草壩黃草壩民居稠密漢多夷少且距州遙遠請於普安州添設州判一員分駐其地稽查姦宄卽將貴

州按察司經歷裁汰改設普安州判從之尋定長壩新設州曰永豐○吏部議准雲貴總督鄂爾泰奏泗城土知府岑映宸橫徵濫派眾不聊生以致殺劫爲活復差攜帶兵器越境拏人甚至調兵數千於者相地方紮營七盤以誇強悍臣等奉旨各調官兵在營候檄岑映宸自知罪犯難逃隨繳印信號紙呈懇免死改流存祀請將岑映宸革去世職改設流官知府岑映宸妻子家口一併解至浙江原籍安插查岑映宸之祖岑繼祿曾有率土兵迎導大軍之功請將岑映宸之弟武舉岑映翰賞給八品頂帶仍居泗城量給田產奉祀不得干預地方生事至泗城一協向設官弁但駐守泗城內哨外哨其接壤黔苗數百里內並無一兵防汛請將泗城協副將裁去改設右江總兵官添設左右兩營遊擊各一左營遊擊兼管中軍事駐紮皈樂地方右營遊擊駐紮百色地方每營

添設千總一把總二泗城協原設守備千總把總仍照前駐紮共設兵一千六百名屬右江鎮管轄再安隆營改爲隆林營添設遊擊一把總一並原設安隆營守備一千總一俱駐紮西隆州共設兵五百名分汛防守聽右江鎮統轄其原設上林守備營兵丁令歸隆林營管轄從之○乙巳議政王大臣等議覆郡王額駙策凌等奏臣等與鄂羅斯使臣薩瓦等相見議定疆界事宜臣以應爲界址之處詳告薩瓦云東邊額爾古納等處昔年內大臣索額圖等與爾使臣費羅多爾等議歸爾國無庸再議今自額爾古納河岸以至阿魯哈當蘇阿魯奇都勒齊克大奇林俱係我處斥堠應以相對之楚庫河爲界自此往西沿布爾古特山等處以博木沙畢鼐嶺爲界定界之後不得混雜居住及容留逃盜人等犯者互相查拏隨與伯四格侍郎圖理琛等以應立界石地方繕寫給與

薩瓦薩瓦及布里雅特吳梁海等俱皆心服據薩瓦云此次幸爲使臣瞻仰 天顏旣優賜我察罕汗復賞賚奉使人眾 皇恩優渥今旣秉公辦理即可永爲定界臣等隨派侍衛胡畢圖郎中納延泰與鄂羅斯副使一番一番諾費池等指定東西界址議立界石俟其同時卽將界址山河地名繕寫繪圖恭呈 御覽應照策凌等所議立石定界曉諭喀爾喀汗王各扎薩克黑龍江將軍等令其約束屬人不得越界生事違者從重治罪至恰克圖口定爲貿易之所應派理藩院司官一員管理貿易人數照例不得過二百其京城鄂羅斯館應爲修整令使臣居住其來京讀書幼童及教習等亦令同居官給養贍如願回者聽其歸國至領侍衛內大臣克什圖前派往代隆科多辦事今疆界已定應令其來京從之

○丁未議政王大臣等議奏翁牛特扎薩克多羅杜楞郡王和碩

額駙蒼津肯恩自專奏請策妄阿喇布坦煎茶之使者入藏行走甚屬悖逆應將蒼津之扎薩克郡王和碩額駙革退其郡王另請承襲得旨扎薩克多羅杜楞郡王著貝子鄂齊爾承襲○戊申諭怡親王大學士富甯安張廷玉等西安滿洲兵著派二千名副都統尼馬善豫備管領甯夏滿洲兵派一千名令副都統蘇圖豫備管領其綠旗兵陝西省豫備五千名四川省豫備三千名雲南省豫備三千名爾等可行文與岳鍾琪鄂爾泰卽遵照派辦管兵之官弁及應用帳房等項一有調發之處候文到卽便啓行岳鍾琪見在四川著回到西安將豫備兵馬之事料理畢卽馳驛來京朕有面降旨之處其陝甘總督印務仍著岳鍾琪隨路帶辦不必委人署理○庚戌八旗都統帶領各旗副佐領引見 上諭各都統等入旗人員乃國家根本所關甚重養育教誨不可少懈佐領

者乃統轄一佐領之人俾佐領下人等皆不失生計不染惡俗養之教之使趨於善莫要於佐領下人爾等理宜爲國家宣力正己率物教育所轄佐領下人佐領內有原管佐領有世管佐領有公中佐領原管佐領乃 太祖 太宗時爾等之祖或率所部來歸或戰陣有功賞賜人口各編爲佐領令其管理是爾等與佐領下人同是滿洲其中亦有從爾等之祖宣力國家得授世職逮於子孫爾等理宜骨肉視之若自以爲原管佐領將佐領下人視同奴隸而陵賤之豈惟國法不容亦敗汝祖勤勞所立之基業矣世管佐領因爾等之祖曾宣力國家或人材可用善於管轄故令其管理佐領世世相傳以至於爾等之身爾等理宜將佐領下人愛惜訓誨念爾祖之勤勞以永保累世所管之佐領也再管公中佐領之人特以其能理佐領之事能教佐領下人是以揀選令其管理

益宜視佐領下人無不成就佐領內事無不辦理矣夫佐領之管
佐領下人無異州縣之於百姓州縣所轄地方或百里有餘或幾
二百里戶口人民不下數萬微槪斷訟事件繁多然猶可爲地方
興利除弊懲惡勸善俾庶民各遂其生一佐領下滿洲多不及二
百人少或七八十人計戶不過四五十家世爲同里孰守分節儉
孰越禮奢修孰孝弟勤學孰妄亂生事諒無有不知者也管佐領
之人誠於佐領內之善者獎勵優待薦舉以鼓勵之則善者益樂
爲善其劣者視如子弟初教之不改再則斥辱之誠如此愛惜而
訓誨之雖係下愚亦必中心省悟儻有賦性頑劣怙終不悛者卽
申詳參領都統等懲戒之或送部治罪以儆眾人則佐領下頑梗
之徒咸懼而不敢爲非矣令佐領內或有不肖之人自恃身爲佐
領陵虐佐領下人不論是非恣意妄行其或昏懦怠惰之輩將佐

領事盡諉之驍騎校領催轉相傳示其或貪鄙之輩不知愛惜反貪小利而賒刻之則佐領下人何由心服何由成就是以朕今特令每佐領設副佐領一員協同佐領辦事和衷其濟儻副佐領不問事理肆行無忌該佐領卽申詳都統若佐領與佐領下人結黨目無副佐領朦朧作弊副佐領亦卽申詳都統不可彼此瞻徇情面爾等以朕訓旨謹識於心將佐領下人教育約束勉習文武之業副朕樂育八旗人材之至意○癸丑刑部等衙門議奏窩盜黃三聖等行劫松江府奉賢縣裴詩度典鋪一案應照強盜窩主共謀分贓例應斬立決得旨黃三聖等著卽處斬黃三聖已經行劫二次此案內又復窩盜分贓兇惡已極而陳時夏以爲情有可原擬以發遣甚屬疏縱前張楷將確實強盜數人改招寬釋又如今歲秋審招冊內署甘肅巡撫鍾保將因姦殺死親夫案內姦夫樊

先成擬爲緩決其夫旣遭慘死其婦又被極刑皆因樊先成而起此人尙可緩決乎又福建巡撫毛文銓將賭博殺死人命之邱奇章擬以緩決邱奇章設局誘賭又復毒毆斃人性命兇惡若此尙可緩決乎書經曰天討有罪五刑五用哉刑罰之設乃帝王代天出治除暴安良之要務而無識之流以爲曲全一人便可得美名而獲厚福殊不知其人無罪而蹈顛危果能救之則爲陰隲儻係犯罪應死之人而故意寬縱是爲枉法殃民豈不上干天地之和乎如國家之設倉積穀乃水旱緩急之所賴百姓性命之所關而徇情邀譽之上司一任屬吏之侵漁而不問以致顆粒無存倉廩空虛一時需用無所資藉而嗷嗷待哺之民已成溝中之瘠是爲民父母而使千百善良之人死於其手此等罪孽上通於天今乃於此處不加儆戒恐懼以贖愆尤而欲曲活行兇劫奪之盜犯以

求邀福於冥冥之中乎古聖人所云罪疑惟輕者亦必其中本有可疑之處然後酌量從輕未聞於無可疑之中而枉法寬貸以沽長厚之名也夫政寬則民慢因而犯法者愈多是不能息事而轉以生事不能愛人而轉以害人故子產云水懦弱民狎而玩之故多死焉火烈民望而畏之故鮮死焉此一定之理也朕覽秋審緩決人犯中亦有情罪可惡者或因彼時正法之人已多故從緩決並非一次緩決之後便永不正法也若內外辦理諸臣以爲一次既寬便不當正法則與緩決二字之意不符陳時夏毛文銓鍾保身任封疆不能秉公持正而枉法故縱是何意見著明白回奏

九月乙卯諭各省督撫等民生日用所需制錢最爲切要朕特爲便民起見屢頒諭旨嚴禁銷毀制錢竝令京城及各省督撫駐紮之省城不許鑄造黃銅器皿三品以下官員及兵民人等不得私

用此朕欲期錢文豐裕爲小民易於資生非朕有所需用也已曾
諄切詳諭不啻再三京城見今奉行錢價已覺稍平乃近聞各處
督撫駐紮之省城銅器店仍用黃銅鑄造者甚多此明係各省督
撫不實力奉行徒以告示曉諭虛文掩飾而已朕向因錢局鼓鑄
日增而錢文日見短少卽知有銷毀制錢鑄造銅器之弊嗣於京
城內屢次拏獲銷毀制錢之姦民而欽差官員至甘肅地方亦見
有毀錢爲器者省會乃督撫駐節之區耳目最近政令易行非若
遠鄉僻壤之難於稽察也若果實心遵奉甚屬易事朕爲制錢籌
畫宵旰焦勞各省地方官辦運銅斤亦甚費經營跋涉之苦然後
官局得以鼓鑄錢文以資百姓之用夫以鑄錢如此之難而奸棍
貪財射利竟將已成之錢復行銷毀故禁用黃銅者所以杜毀錢
之源也今特再加訓誠各省督撫務宜實力奉行儻仍前疏忽定

將督撫嚴加處分至從前曾斟酌三品以上許用黃銅器皿今覺濫用者多嗣後惟一品官員之家器皿許用黃銅餘著通行禁止

○戊午諭戶部前商人胡嘉佩等虧欠帑銀開出朝鮮國人賒欠銀六萬餘兩以抵公項朕恐開報不實或有累及外國之處故令行文詢問竝令內地貿易之人與朝鮮賒欠之人在中江地方質對明白使中外之人不得互相推諉以息擾累今據盛京禮部奏呈朝鮮國王李昉咨文支離巧飾則該國之人欠銀之處顯然矣本應照議案數追還朕思當日朝鮮已故國王李燾才幹優長政令嚴肅深蒙 聖祖仁皇帝眷注加獎李燾曾將伊國負欠之人正法想見其辦事之公明向聞李昉柔懦無能觀此咨文推託牽強必其陪臣所爲非該國王語氣似此清查積欠之事該國王不能辦理今若以不能辦理之事委之甚非朕柔遠之意此案不必

質對其朝鮮國人應還之銀著從寬免追此朕加恩於外藩竝非

疏法於內地也至從前該國王李燉理民馭下之善朕至今思之

○徐琳緣事革職以覺羅白清爲江南江蘇按察使由員外郎遷○庚

申諭議政王大臣等前因達爾報稱康濟爾被擒之信恐策妄阿

喇布坦有窺伺西藏之意是以降旨令陝西各路及四川雲南各

派兵馬豫備以候調遣今康濟爾被害情由係西藏噶隆等彼此

不睦自相殘害之小事不須用兵著將各路兵馬停止不必豫備

○理藩院奏稱青海貝子噶爾丹代青諾爾布病故無人承襲伊

妻請以姪貝子達錫策零兼襲伊夫世職查貝子無兼襲兩職之

例應無庸議得旨噶爾丹代青諾爾布於青海羅卜藏丹津之事

著有功績因議敘封爲貝子今既病故伊兄弟兩家止有貝子達

錫策零一人著從優加恩並兩貝子職晉封爲貝勒世襲罔替○

癸亥諭大學士等弭盜安民乃爲治之首務但緝盜之例最難於斟酌盡善如立法稍嚴似可防盜犯漏網之虞杜地方官諱匿不報之患然上司督責州縣州縣督責捕役按期處分勒限責比過於迫切人多顧惜考成巧圖脫卸勢必有誣陷冤濫之事如立法稍寬似可詳籌緝捕免累無辜然又恐州縣視同膜外漫不經心捕役玩法養奸盜風愈熾此緝盜設法之難也至於失事之家往往亦有張大其詞者或以少爲多或以竊爲強甚至扳害平人洩其私憤挾制官長任意肆行此又報盜之弊也以上種種情形朕皆知之甚悉今覽田文鏡奏摺豫省地方有全無影響而捏報被盜者有別因事故而託稱盜案者有以竊爲強欲快其挾制之私者有以口角微嫌遂報被盜欲逞其刁誣之計者既有如此惡習法當嚴加禁止但思若嚴捏報被盜之處分刁詐者固知斂迹恐

謹良者必至不敢報盜矣朕實難之夫弭盜之法貴乎至公至平寬嚴輕重之間皆須斟酌得宜俾盜犯不能漏網平民不致拖累官吏皆盡緝盜之責而不敢任意以失實事主得伸被盜之苦而不敢借端以滋擾如此匪類方知儆懼而良民悉得甯居爾等可會同九卿科道及部曹內曾經外任年久者悉心酌議務期妥協並將田文鏡摺內詳議具奏○吏部議准河南總督田文鏡奏南陽府屬舊有南召縣順治十六年裁併南陽縣管轄止設巡檢一員駐紮南召縣署但其地界連萬山路通山陝湖廣五方叢雜實屬要區請將南陽通判移駐南召其原駐南召之雅路鎮巡檢改駐南召嵩縣適中之李清店地方從之○禮部議覆四川巡撫憲德奏成都府灌縣都江堰口廟祀李二郎從前未授封號查係秦蜀守李冰之子二郎除水怪鑿離堆穿三十六江灌溉成都等州

縣稻田至今江水安瀾不乾不溢應請敕賜封號等語按史記漢書專載蜀守李冰鑿離堆穿二江惟灌口志書內有使其子二郎鑿山穿江之事是李冰實主治水之功又按王圻續文獻通考元至順元年封秦蜀郡太守李冰及其子二郎俱爲王爵今該撫止請封李二郎而不及李冰似未妥協請將李冰並給封號之處恭候 欽定得旨李冰李二郎俱著給與封號封李冰爲敷澤興濟通佑王李二郎爲承績廣惠顯英王○乙丑諭吏部凡縣令改授敎職者因其不勝牧民之任例當罷黜朕念其讀書攻苦選授一官不忍遽令廢棄是以俾居師儒之席以展其所學此朕格外之恩也況敎官有化導士子之責較理民之任關繫尤重應當殫心竭力以盡職守儻因改授之故志氣墮頽奉職怠忽著各省巡撫學政查參議處○調孔毓璞爲陝西甘肅布政使以彭維新爲浙

江布政使李秉忠爲河南按察使

由內閣侍讀學士遷

○以呂耀曾爲四川

按察使

由湖廣武昌道遷

○吏部議奏甘肅布政使護理巡撫印務鍾保

因固原州偶遇驟雨城牆舊甃剝落田禾畧被冰雹尙未成災乃並不確查冒昧具奏殊屬不合經提督路振揚目覩情形據實陳明鍾保應降三級調用得旨鍾保由司官之職朕加恩擢用至布政使伊到任以來專務虛名並不實心辦事上年詳辦兵糧一摺將國家錢糧市恩邀譽今年秋審又將因奸殺死親夫之重犯擬以緩決刑罰顛倒見者無不駭異至於具奏錯誤乖張之處不可枚舉一味柔輒沽名鍾保著革職以爲人臣負恩溺職者之戒○丙寅諭王大臣等王公大臣官員等朝服頂帶俱有定制但平時所用服色並無分別應如何辨別品級之處著議政王大臣九卿會議具奏尋議諸王及大小臣工平時所戴暖帽涼帽俱照朝帽

頂分別令其戴用凡諸王世子郡王長子貝勒貝子入八分公俱用紅寶石頂未入八分公固倫額駙民公侯伯鎮國將軍及一品大臣俱用珊瑚頂輔國將軍奉國將軍多羅額駙二品三品大臣俱用起花珊瑚頂奉恩將軍固山額駙及四品官員俱用青金石頂五品六品官員俱用水晶頂七品以下及進士舉人貢生俱用金頂生員監生俱用銀頂從之○命孫柱爲文淵閣大學士實授查弼訥兵部尙書○解韓良輔任調阿克敦署廣西巡撫由署廣東巡撫

調○戊辰諭吏部聖人之道爲人臣者過闕必趨而於家庭父母之前亦有趨庭之禮蓋因敬謹之念素存於中故舉動威儀之間自無怠忽也前者大朝之時有漢司官二人於班聯之中大失禮節朕降嚴旨欲治二人之罪嗣後眾人皆知儆惕因而寬釋至於引見之時往往漢官有在朕前高視闊步舉動不恭者又聞各部

堂司官辦理公事滿司見滿堂則屈一膝應對而漢官之對漢堂
官則或立或蹲一任其意同一堂司何以滿漢之禮互異卽科道
滿漢禮節亦不相同況漢司官升遷方爲道府道府之見督撫卑
躬屈節竟有違例朝服跪道以爲恭敬惟恐以簡畧獲罪者夫督
撫品級既不及部院堂官而司官品級則又卑於道府何以爲京
官則傲慢不恭而爲外吏則謙抑過度是伊等不知爵位之尊卑
而但論權勢之輕重也司官不敬堂官相沿日久平日不知禮儀
是以至朕前亦不能約束身心每至草率不恭如昨日御史韓瑛
於朕御門時捧持本章竟不恭敬高舉今已被參見在部議又如
原任侍郎陳守創年羹堯曾奏其粗率無禮一日在諸王大臣會
議之處曳衣露足見者無不哂笑從來滿洲風俗尊君親上出乎
至誠事事不敢越禮而漢人不知做做何也朕以誨人不倦爲心

有一見聞即明白指示欲其醒悟後改不忍聽其暗昧終身大凡爲司官而不敬堂官者其人必無上進之志滿漢司官之禮自應畫一如何酌定著九卿會議具奏尋議嗣後朝房辦事堂官席地而坐漢司官應照滿司官俱屈一膝應對於堂官前往來俱行趨走漢科道亦照滿科道禮節畫一遵行其有或踣或立怠慢不恭者俱令該堂官指名參處該堂官瞻徇不行參出者一併交部議處從之○諭戶部向來山西虧空甚多國帑久虛不能彌補不但毫無益於國帑此等劣員轉將虧空爲護符無所不爲民生實受其害諾岷涖任後將虧空人員盡行參革酌定以公完公之法將州縣之火耗重者嚴行裁汰酌中量留耗羨抵補無著之虧空不使累及民間而官員亦免承追不力之參罰又恐官員無以養廉復酌撥以爲日用之資凡地方公務所需亦皆取給於此上不誤

公下不累民此實通權達變之良策也諾岷在任二年將山西數十年未清之積案漸漸就緒伊都立接任柔懦無能且好務虛名因循瞻顧從前諾岷之未及清理者未能清理一事當諾岷在任之時高成齡不得已協力相助上緊辦理及伊都立接任高成齡苟且怠忽贊成伊都立之廢弛今見年歲已久舊案不能楚結又經朕數次嚴諭始請定承追之限獨不思數年以來藏匿花費弊端種種清理愈難高成齡何不陳奏於從前而乃遲至於今日乎應如何追完之處俟石麟到任後與高成齡悉心定議具奏伊都立曾奏稱地方虧空彌補全完之後應將耗羨解充公帑他省亦屢有如此陳奏之人朕皆嚴切訓飭之蓋耗羨者出產於地方卽小民之膏脂也以地方之出產完本地之虧項所謂以公完公官民均有裨益若虧空既完則此項耗羨應仍歸於本地之官民豈

有收入公帑之理他省亦有將州縣之耗羨提解十分中之二三以備公用者該地方大吏應念此項雖充公用實民力之所輸將百凡撙節愛惜不使妄費遇有應用之事而後動用方爲節用愛人之道乃近來督撫藩司等多以此項旣已捐之於公取攜甚便任意支用如此非諾岷提解火耗之初心矣昨田文鏡奏稱河南固始縣東關官河一道地勢窪下七月間驟雨水漲東岸長興集西岸站馬集二處被水浸注民房倒塌漂沒人口幸而水退甚速禾稼無恙並不成災無庸題請蠲免其被水人民已將司庫存貯耗羨之銀動撥令道員確查散賑加意撫恤等語如田文鏡之辦理此事乃以地方之耗羨爲地方之公用百姓得霑恩惠而耗羨之留誠爲有益大凡地方小有水旱之事勘不成災於例不應題本者該督撫當就近酌量料理並具摺奏聞務令朕得知地方情

形無絲毫隱匿方不負封疆大臣之任田文鏡所奏固始臨河鄉村被水之處河道或有應修濬以除水患者著田文鏡商酌辦理○己巳雲貴總督鄂爾泰奏臣前任江蘇藩司於所屬水利悉心咨訪畧知大要及奉命來滇心未暫忘前閱邸鈔知 聖主發帑金十萬委大臣辦理更蒙 聖恩著臣胞弟鄂禮同往協辦謹據臣所見冒昧陳奏按劉河白茆二處奉旨開濬此誠湖海二區之脈絡江浙六郡之要津也至江甯之秦淮其源有二一出句容華山一出溧水東廬山合流入方山埭自通濟水門入於郡城內外交資其利甚溥但久不疏濬河道雖存僅於夏秋暫通舟楫如不及今疏濬勢必日就湮廢若揚州之五塘久屬豪強侵占而故址尙存由揚州至邵伯高郵寶應直達淮安稍遇水大一望汪洋若開濬五塘亦足分其下流但河隄縣亘三百餘里設閘雖多而淮

黃及湖一時匯聚橫行泛溢須別分支河出水迅駛則淮揚二郡永遠奠定庶江北之水患息矣江南自劉河白茆之外其南北要津莫如鎮江之漕河在丹徒界者四十五里在丹陽界者九十里地勢如建瓴雖有京口呂城奔牛諸閘可以蓄水而河身淺狹每年隨濬隨淤皆由挑濬時淤泥堆積兩岸大雨淋漓仍復衝卸入河一至冬月水涸難行漕船輓運艱難民船起旱盤壩公私交困臣查此地係杭嘉湖蘇松常鎮七府行漕之河而向來每歲挑濬獨責之丹陽是丹陽之民獨受其累臣於雍正二年閒料估工費公中疏濬然猶未能如式且附近各境有可比丹陽之練湖者皆應開通以助運河使流注無窮不須復浚庶爲一勞永逸之計至各郡州縣之內外城河並各鎮市支河港瀆塘浦之類一切疏通之法總須倡率有方調度得宜又非臣言之所能盡也臣曾任江

南故不揣愚昧越職陳奏得旨覽鄂爾泰所奏江南水道事宜甚屬周詳但摺內有越職陳奏字樣凡內外大臣越職辦事固爲不可至非己身職任之事有關國計民生者既有見聞據實入告方合公忠體國之義乃盡職非越職也鄂爾泰所奏發與范時繹陳時夏齊蘇勒陳世倌鄂禮就近詳加相度悉心妥議具奏○雲貴總督鄂爾泰奏花苗一種介在楚黔兼連西粵犷悍難馴謬沖尤甚今黎平府知府張廣泗率領員弁攻破其地陸續擒獲賊苗共二百三十餘名所有渠魁姚相明等見在定擬會題自此各寨畏威懷德有歸歐鬼壘九厥交椅几馬等寨俱花苗種類其頭目率領羣苗冊開戶口花名同詣行營願求內附查歸歐鬼壘等寨係黎平府所屬洪州土司界外應歸洪州轄交椅几馬二寨係廣西懷遠縣所屬幹沖地方界內應歸懷遠縣轄從之○庚午雲貴總

督鄂爾泰奏雲南永北府蒞築地方與四川之腊汝窩邊界相接
今四川建昌總兵官趙儒征勦腊汝窩臣以川省用兵事同一體
隨委永北遊擊徐成貞等率領健兵五百名前往蒞築駐紮分路
堵禦協同川兵進勦擒殺多人餘皆降服兩省各皆撤兵回營諭
封疆大臣不分彼此毫不推諉瞻顧何事不能辦理也嘉悅覽之
○辛未雲貴總督鄂爾泰奏雲南臨元鎮屬威遠新平一帶地方
猥賊猖獗潛匿魯魁哀牢出沒江內江外爲害已久前以鎮沅逞
逆因而威遠猥賊札鐵匠等乘機劫寨新平之李百疊等亦肆行
搶殺臣嚴檄臨元總兵官孫宏本等帶弁兵協力擒勦深入搜箐
斬殺過半威遠猥賊擒獻賊首扎鐵匠等新平兇賊李百疊聞風
畏懼亦率眾投訴願爲良民從此威遠新平地方安堵得旨嘉獎
○添設四川驛鹽道一○壬申以石禮哈署廣東巡撫

由廣州將軍著○

甲戌添設湖北糧道庫大使一裁蒲圻縣羊樓司巡檢一○乙亥
諭內閣滿洲居首之大學士在前行行走外其餘大學士行走班次
應按其補授之日前後行走不必分別滿漢張廷玉著在孫柱前
嗣後補授大學士時著將班次前後請旨具奏○丙子諭各省督
撫藩臬等朕宵旰勤勞時以教養萬民爲念所頒諭旨皆正德厚
生之要務實切於民生日用者乃聞向來諭旨頒至各省不過省
會之地一出告示州縣並未徧傳至於鄉村莊堡偏僻之區則更
無從知之矣如禁止黃銅賭博宰牛等事朕爲百姓籌畫者委曲
周詳而地方官員有司不行禁約上司置若罔聞無怪乎百姓之
迷而不悟也京師乃五方雜處之地凡禁約之事較他省爲難今
京城內外市賣銅器及羣聚賭博者俱已禁止豈外省轉不能行
乎他如清查保甲積貯社倉之類行之必以其漸地方始無紛擾

若驟然舉行而迫之以官法奸胥猾吏將借端爲非轉爲小民之累今觀地方大吏於應當從容辦理之事則急切爲之而於一時可以禁止之事實有益而無害者則漫不經心豈非緩急失宜先後不得其序耶至於邪教妖言大有關於人心風俗該地方官一有所聞卽當留心根究庶可以消奸宄而安良善所謂防微杜漸也若下屬隱匿不報或上司知之又欲化有事爲無事勢必致姦宄漏網匪黨無所忌憚附和者愈眾則將來株連者愈多是本息事而轉致多事故不如懲治之於早也各省督撫藩臬皆地方大吏勉之母忽○丁丑諭刑部刑名關係民命死者不可復生斷者不可復續故禮記王制曰刑者例也例者成也一成而不可變故君子盡心焉朕於刑名更加慎重書曰天討有罪五刑五用哉五刑有輕重之等無一非天理之當然故當輕當重必須至公至平

乃爲欽承天道若應嚴而寬便是逆天稍寬且不可而況於嚴乎
朕爲人君尙不可寬嚴稍失其平況人臣居法司之任者乎凡有
案件始之以聽斷繼之以研訊定之以律例若稍有不公不平之
處則情罪之輕重不得宜而用法之寬嚴皆失其當矣蓋鴟鴞不
除無以致鸞鳳狼莠不翦無以植嘉禾司刑名者姑息養奸則小
人無所懲戒必不能改惡以從善此所謂婦人之仁其害豈淺小
哉故刑法者使人遷善遠罪所以輔教者也舜之勉皋陶曰汝作
士明于五刑以弼五教期於予治刑期于無刑民協于中夫持法
之平可以成協中之化故居法司之任者不但重罪不可疏忽卽
輕罪亦當詳慎務操其至公至平之心而時懷天監在茲之懼使
用法之寬嚴悉當情罪之輕重允孚則不愧明允之司而成無刑
之治矣○戊寅刑部疏參蔡珽從前在四川巡撫任屢蹈重罪部

議革職及威逼屬員蔣興仁自盡部議斬罪悉蒙 聖慈寬宥擢授左都御史洊至兩部尚書兼漢軍都統署理直隸總督仍敢肆行無忌種種不法復蒙矜宥調授奉天府尹乃尚不改悔挾詐懷私罪案山積今將蔡珽所犯諸罪謹列陳之如怡親王等查勘水利撥兵引導訛傳七省騷擾營兵其罪一伊子廕生欺公請復其罪二本章錯誤並不認罪狡飾狂悖其罪三甯遠州知州孫大桐將徵收米石私自借出蔡珽徇隱不參其罪四屬員刑名案件故違部限蔡珽袒庇不提其罪五錦縣知縣呂曰宮虧空米石蔡珽代爲欺隱其罪六奉天府屬徵收銀米擅令停解任意藐法其罪七奉屬各府州縣支給俸工銀兩竟不飭查日期疏忽政務其罪八甯遠等州縣所收莊頭餘地租糧草束改折銀穀並不詳查玩忽國計其罪九鋪司被人奪去公文並不批查懈弛公務其罪十

眾民控告訛詐案件竟不准理縱暴殃民其罪十一盛京侍郎武格所參孫大桐疏縱一案並無冤抑蔡珽懷私妄奏其罪十二私受夔州府知府喬鐸夔關稅銀一千八百八十兩富順縣知縣劉上駟鹽規銀五千兩婪贓入己其罪十三捏造公用名色冒銷藩庫銀三萬兩其罪十四收受貪殘不法之程如絲銀六萬六千兩金九百兩貪賄庇姦懷欺保舉其罪十五交結大逆不道之查嗣庭其罪十六黨庇行止妄亂之戴鐸其罪十七譏謔岳鍾琪稱爲不可深信後岳鍾琪經過保定時又恐姦迹敗露轉以無稽荒謬之語巧爲播弄譏忌姦險其罪十八案之律例蔡珽所犯諸罪均干大辟蔡珽應斬立決伊妻子入辛者庫財產入官今伊見在四川質審應行文四川巡撫將伊作速鎖解來京正法得旨蔡珽從寬改爲應斬著監候秋後處決餘依議○己卯川陝總督岳鍾琪

奏湖廣江西廣東廣西等省之民逃荒入川不下數萬戶請開招
民事例給窮民牛具籽種令其開墾荒地地方爲有益得旨覽岳鍾
琪奏朕心深爲憫惻各省大小官員於地方歉收卽當題請設法
撫恤況各省皆有耗羨備用銀兩卽當以此爲賑恤貧民之用何
得坐視百姓之窘迫不加賑恤而令其逃往他省乎今據岳鍾琪
奏請設法安插令其開墾以爲生計此實安輯貧民之急務其牛
具籽種口糧等項之費不必另開事例見今有營田水利捐納銀
兩數餘之項存貯在京著於此內撥發十萬兩解川應用備有不
敷該督撫再爲奏請但此等遠來多人良莠莫辨不行稽查必轉
爲良民之擾且恐旣開招墾之端愚民無知但圖目前之利必至
輕去其鄉亦非所以愛之也且地方官吏坐視百姓之遠徙異鄉
而不知軫念斷不可不加懲戒著岳鍾琪會同巡撫憲德行令四

川州縣將雍正四年秋冬以後各省入川人戶逐一稽查姓名籍貫果係窮民酌量安插再備造細冊咨查原籍將所用牛種口糧銀兩著落原籍之州縣官照數補還如此則游惰之民不至混冒而地方官亦知所做戒共以愛養百姓爲務可杜流移之患於將來矣○辛巳吏部奏廣東肇高道王士俊揭報廣東布政使官達受賄婪贓令重役李長茂委管黃江廠稅王士俊詳請署撫阿克敦嚴訊署撫令按察使方願瑛力勸士俊從寬銷釋等情得旨官達方願瑛俱著解任質審廣東布政司印務著少詹事王慕署理按察司印務著翰林院侍講尹繼善署理○壬午移南河上北河同知駐陽武縣太平鎮新設上南河同知駐中牟縣楊橋下北河同知駐祥符縣陳橋懷慶府黃河同知駐武陟縣二鋪營武陟縣主簿駐木欒店○是月免江南溧陽無錫上元吳江安東等縣雍

正四年水災額賦有差

冬十月甲申川陝總督岳鍾琪奏勦撫建昌冕山賊番事竣苗疆底定普雄涼山地方遼闊請暫留兵丁彈壓土兵口糧並懇賞給得旨冕山賊番向來逞惡肆姦敢行不法久爲民害地方大吏畏難因循不肯辦理岳鍾琪遵旨勦撫調度有方俾苗疆永遠甯謐甚屬可嘉岳鍾琪著交部議敘並將任事官兵加恩議敘賞賚其兵丁等借支銀兩槩加賞給不必扣還○諭大學士九卿等科道職司言路乃朝廷政務所關當矢竭公忠無欺無隱方爲稱職朕觀數年以來科道陳奏者並無忠讜可信之詞又有庸陋之科道既不敢直陳政務之大端又恐蹈緘默之愆往往摭拾瑣細迂謬毫無關繫之事濫行條奏甚至顛倒是非紊亂黑白或借以行私植黨者有之從來人君聽言納諫原爲美德但言之公者自應嘉

納而言之私者豈可漫爲聽從今科道所奏朕若不加採納則以朕爲不能受諫若所言謬妄而稍爲懲戒則謂朕刻待言官以杜忠諫之路此爲君之所以難也舊例科道吏部等官專用科目出身之人科道職司糾參吏部管理考察相爲表裏凡外任科目出身之州縣官一經行取內升卽可補授吏部科道由是操督撫之長短敢於上司前傲慢無禮爲督撫者亦恐結怨報復不加約束頗爲吏治人心之害是以數年以來行取之典未曾舉行朕思禮部管理科場翰詹職司文翰國學官員有課士之責自宜專用科目之人若科道吏部皆係辦事衙門並非用其文墨也何必拘定科目乎朕意欲將舊例變通以杜黨援之弊而收用人之效嗣後銓補科道吏部及州縣行取之例著大學士九卿等詳議具奏但此例相沿已久今欲變通若稍有未協恐生疑議如或不應更易

卽各陳所見毋面從背非以蹈欺罔尋議嗣後科道缺出在京則令翰林院掌院於編修檢討內保送各部院堂官於各屬司官內不論科甲貢監擇勤敏練達立心正直者保送引見恭候選定其留京者以科道補用至吏部四司郎中等員缺與戶兵工刑四部司員不論科甲貢監俱歸月選從之○丁亥順承郡王錫保等遵旨審奏隆科多罪案大不敬之罪五欺罔之罪四紊亂朝政之罪三姦黨之罪六不法之罪七貪婪之罪十六查隆科多私鈔玉牒收藏在家大不敬之罪一將 聖祖仁皇帝欽賜御書貼在廂房視爲玩具大不敬之罪二妄擬諸葛亮奏稱白帝城受命之日卽是死期已至之時大不敬之罪三盛京兵部主事馬岱之事屢奉 聖諭隆科多明知干犯復行妄奏大不敬之罪四 皇上賞銀三千兩著令修理公主墳墓隆科多遲至三年竟不修理大不

敬之罪五 聖祖仁皇帝升遐之日隆科多並未在 御前亦未

派出近御之人乃詭稱伊身曾帶匕首以防不測欺罔之罪一狂

言妄奏提督之權甚大一呼可聚二萬兵欺罔之罪二時當太平

盛世臣民戴德守分安居而隆科多作有刺客之狀故將 壇廟

桌下按查欺罔之罪三妄奏被參知縣關隴原係好官欺罔之罪

四 皇上謁 陵之日妄奏諸王心變紊亂朝政之罪一妄奏調

取年羹堯來京必生事端紊亂朝政之罪二妄奏舉國之人俱不

可信紊亂朝政之罪三交結阿靈阿揆敘邀結人心姦黨之罪一

保奏大逆之查嗣庭姦黨之罪二徇庇傅鼐沈竹戴鐸巴海不行

查參姦黨之罪三比暱伊門下行走之蔡起俊姦黨之罪四徇庇

阿錫鼐法敏將倉場所奏浥爛倉米著落歷年監督分賠之案巧

爲袒護具奏姦黨之罪五曲庇菩薩保屬託佛格免參姦黨之罪

六任吏部尙書時所辦銓選官員皆自稱爲佟選不法之罪一縱容家人勒索財物包攬招搖肆行無忌不法之罪二徇庇提督衙門筆帖式詹泰屬託吏部侍郎勒什布改換成例不法之罪三發遣西安人犯應給口糧並赤金等處應裁應補兵丁之處故行推諉欲以貽誤公事不法之罪四因係佟姓捏造惟有人冬耐歲寒之語向人誇示以爲姓應圖識不法之罪五自知身犯重罪將私取金銀豫行寄藏菩薩保家不法之罪六挾勢用強恐嚇內外人等不法之罪七索詐安圖銀三十八萬兩貪婪之罪一收受趙世顯銀一萬二千兩貪婪之罪二收受滿保金三百兩貪婪之罪三收受蘇克濟銀三萬六千餘兩貪婪之罪四收受甘國璧金五百兩銀一千兩貪婪之罪五收受程光珠銀五千兩貪婪之罪六收受六格貓睛映紅寶石貪婪之罪七收受姚讓銀五百兩貪婪之

罪八收受張其仁銀一千兩貪婪之罪九收受王廷揚銀二萬兩
貪婪之罪十收受吳存禮銀一萬二千兩貪婪之罪十一收受鄂
海銀一千五百兩貪婪之罪十二收受佟國勳銀二千四百兩貪
婪之罪十三收受佟世祿銀二千兩貪婪之罪十四收受李樹德
銀二萬一千四百餘兩貪婪之罪十五收受菩薩保銀五千兩貪
婪之罪十六以上罪狀昭著隆科多應擬斬立決妻子入辛者庫
財產入官 上召議政王大臣內閣九卿等諭曰隆科多所犯四
十一款重罪實不容誅但 皇考升遐之日召朕之諸兄弟及隆
科多入見面降諭旨以大統付朕是大臣之內承 旨者惟隆科
多一人今因罪誅戮雖於國法允當而朕心則有所不忍隆科多
忍負 皇考及朕高厚之恩肆行不法朕既誤加信任於初又不
曾嚴行禁約於繼今惟有朕身引過而已在隆科多負恩狂悖以

致臣民共憤此伊自作之孽 皇考在 天之靈必昭鑒而默誅之隆科多免其正法於暢春園外附近空地造屋三間永遠禁錮伊之家產何必入官其應追贓銀數十萬尙且不足抵賠著交該旗照數追完其妻子亦免入辛者庫伊子岳興阿著革職玉柱著發往黑龍江當差○理藩院奏鄂羅斯頭目郎喀呈請將商人之馬匹牛羊留在張家口外牧放應如所請令張家口察哈爾總管嚴行稽查盜賊禁止鬪毆得旨鄂羅斯既欲將伊等馬匹牲畜牧放邊外著照所請行卽派司官一員前去稽查盜賊禁止鬪毆並曉諭鄂羅斯郎喀爾等留住之人必須揀選善能管轄者爲首使約束爾等之人毋令生事再行文與就近居住之總管等著各屬下人加意約束防禁盜賊鄂羅斯係外藩小國如伊等馬匹牲畜被人偷竊遺失查係何處地方卽著該地方總管等查緝交付若

不能查獲著該地方總管等照數賠償○戊子諭吏部臺灣遠隔重洋向來學政交與臺灣道兼管朕思道員管理地方之事又兼學政未免稍繁應將學政交與派往巡察之漢御史管理永著爲例○戶部遵旨議覆西安八旗出征官員所借銀兩請於各人所得俸銀內坐扣其休致病故者俱於伊等子弟所得俸銀錢糧扣完得旨凡出征兵丁所借銀兩朕已加恩盡行豁免其官員等所借俸銀未曾豁免者原有深意蓋官員與兵丁不同若與兵丁一體豁免則將來遇有差遺之事本人不便借支該管官不便借給緩急之際轉覺無所資藉所以未曾降旨豁免者正加恩於出征之官員也但已經休致及亡故之人本身既無俸可扣於其子孫俸餉內扣還朕心不忍除有罪革職人員外著加恩全行豁免至外委之員本無俸祿可以指借當時何得借與以市私恩著查明

於原借給之將軍大臣名下追補凡滿洲蒙古漢軍綠旗各處出征之官員俱照此旨行○己丑諭內閣外省鄉試房考舊例皆用見任知縣入闈朕思知縣身爲民牧地方政務甚繁入闈動經數月慮諸事或致遲誤朕意欲將外省房考之例斟酌更定或於鄰省中舉人進士之在家候選者臨期調取數十人交與監臨之督撫秉公掣籤令其入闈分校著九卿悉心詳議具奏○召何世堪來京陛見以祖秉圭署貴州巡撫赫勝額署貴州布政使張廣泗署貴州按察使由黎平府署○命大學士九卿等觀浙江巡撫李衛所進瑞穀大學士等奏 皇上至德光昭太和翔洽是以宇內徧產嘉禾浙江又呈瑞穀臣等不勝歡欣得旨覽卿等所奏此非朕涼德所能致想浙省澆漓之習必然不變是以感召上蒼如此之瑞應朕深爲浙省臣民慶幸著將此曉諭浙江通省○刑部等衙門

奏宛平縣民重陽因伊妻龔氏與張起鳳通姦將龔氏打死張起鳳被打走脫重陽應擬絞監候得旨律載止殺姦婦者照毆妻至死律擬絞蓋恐姦情不實將此杜借名殺妻之弊若姦情是實而姦夫被毆走脫及拏獲到官承認者亦照此擬罪殊未允協著九卿會議具奏尋議本夫於姦所獲姦將妻毆死姦夫走脫後被拏獲到官審明姦情是實姦夫供認不諱者將姦夫擬絞監候本夫照不應重律杖八十永爲定例從之○庚寅諭吏部朕因盛京各官習氣不好是以揀選京員調補原欲其悉心辦理事務若到任未久卽以京城員缺升用於盛京部務無益嗣後由京補授盛京滿漢司官歷俸三年方行升轉如三年內遇伊應升之時爾部奏聞以升銜留任仍以升銜較俸○命班第回內閣學士任調眾佛保爲理藩院右侍郎以顧魯爲理藩院左侍郎

由內閣學士選

○辛卯刑

部議奏四川成都府擊獲捏稱岳鍾琪造反之人據侍郎黃炳等
審係湖廣黃州府麻陽縣民盧宗漢寄居川省長壽縣因贖田私
事希圖准狀播造浮言沿街叫喊並無主使之人應將盧宗漢照
妖言惑眾律擬斬監候從之○壬辰諭內閣朕覽文武官員履歷
開載年歲任意增減多有不實外省文武年歲不實者尤多國家
用人惟論其才力之可以辦事任職與否原不以年歲之老少爲
重輕如老成望重之人宜於居官服政年歲雖多精神尙健卽屬
可用之員若年歲未老而志氣萎靡則不可用是多者不必減之
爲少也少年精壯之人宜於效力宣勞年雖輕而辦事勤敏亦屬
可用之員若年齒雖大而才具庸劣則不可用是少者不必增之
爲多也人之立身事事皆當誠實不可涉於欺詐彼增減年歲者
無益於功名而有關於品行豈得習爲固然今朕特爲訓諭凡各

官從前之年歲不實者著卽行更正令以實在年歲開明註冊○
癸巳以博爾屯爲駐防阿爾泰將軍查克旦爲參贊大臣○發帑
優恤索倫窮民及效力兵丁○甲午戶部議覆河道總督齊蘇勒
等疏報江南朱家口堵塞之後安河等淀以至木家墩一帶地方
盡淤成膏腴美地分晰丈勘新淤地畝泗州虹縣桃源睢甯宿遷
五州縣共丈出二萬二千六百二十二頃六十三畝零共應升科
銀四萬八千四百五十兩零此新淤之地俱係平行沃土非尋常
湖灘可比應卽於雍正六年升課起租其木家墩一帶俟乾涸之
日陸續清丈另行報升並請於五州縣適中之地在宿遷縣白洋
河鎮設立衛守備一員徵收錢糧新衛賜以嘉名伏候 欽定從
之尋定新設衛曰潼安○乙未賚會試下第武舉路費○命建八
旗學舍○丙申諭大學士九卿等天地生財原以濟生民之用貴

乎流通於宇宙之間故出之於此得之於彼流通轉移各受其益此卽哀多益寡酌盈劑虛之道也乃愚昧無知之人不明此義惟恐積之不固祕之不深或以萬計或以數十萬計埋藏地中多方掩蓋不令人知迨歲月久遠子孫亦無從蹤迹遂致迷失是鎔銖而積之什襲而藏之者竟歸於烏有亦惑之甚者也或有時被他入創取旁觀伎如每致紛爭角訟因而受累招尤豈非埋藏者實貽之害乎似此愚昧無知之見若不明白開導終至迷而不悟朕爲愛養生民計欲使財寶流通彼此得其利濟其作何曉諭勸戒禁止之處著九卿會議具奏再富家巨室每以金銀殉葬毫無益於死者而徒啓小人覬覦之心厥後往往不免偷掘之事此其於理不順於事非宜更不待智者而後知也並將此通行曉諭勸導之尋議通行八旗及各直省督撫轉飭地方官徧張告示宣揚

聖訓明白曉諭禁止嗣後有將金銀埋藏地中及被他人偷掘者
事發將所藏金銀充地方賑恤窮民之用至以金銀殉葬尤非禮
制應一併曉諭禁止從之○飭各省總兵官毋得進獻方物○戊
戌命文淵閣大學士張廷玉爲文華殿大學士仍兼管戶部尙書
翰林院學士事○禮部等衙門遵旨議覆各部院堂司官相見儀
注並請滿漢畫一遵行不得互異得旨堂司相見體統雖經大臣
等議定而科道與各部司官皆不曾與議恐狂妄無知之小人將
來別有議論亦未可知此所定儀注著科道與部院司官公同詳
議具奏尋議朝廷名分自有尊卑滿漢禮儀尤當畫一所議堂司
相見儀注及滿漢科道體統相同之處至爲允當應請著爲定例
永遠遵行從之○己亥諭議政王大臣等阿爾布巴差兵至阿里
欲害頗羅鼐被頗羅鼐將伊所發之兵盡行截殺已領兵往招征

劔阿爾布巴此舉若能事成於西藏有益但今見有欽差馬喇僧格在藏恐伊等或爲阿爾布巴所惑從中講和或被阿爾布巴誑誘以致頗羅爾受害則大有關係著岳鍾琪於川陝標下官員內選擇熟習番情通曉番語可以差遣往藏者速令其前往將一應情節密述與馬喇僧格俾伊等心中明白則諸事無阻此諭著學士班第送去其詳悉之處班第口傳○軍營效力行走原任大同總兵官馬觀伯奏鄂爾昆圖拉地方爲極邊初墾之地近產瑞麥有一莖至十五穗之多實屬希逢之上瑞罕覲之嘉祥得旨今歲各省俱產嘉禾頃馬觀伯復進瑞麥朕觀自古聖帝賢王皆務實心實政不以祥瑞爲尙朕深明此理擯斥虛文因今歲爲通行藉田典禮之初卽獲感召天和是以特爲表著以明天人感應之理捷於影響期中外諸臣益加誠敬共相儆勉於將來也但恐地方

有司未必深悉朕心或競尙嘉禾之美名借端粉飾致有隱匿旱澇而不以上聞者亦未可定著將雍正五年以後各省田畝所產嘉禾俱停其進獻奏聞○庚子諭內閣鳳凰城中江稅務向來俱係城守尉等官管理此處係外國交易之地關係緊要嗣後著盛京五部堂官於司官內揀選奏聞派出管理一年更換○辛丑加湖廣總督邁柱兵部尙書○癸卯諭滿漢文武大臣等凡爲國家大臣者非爵位崇顯體貌魁梧之謂必其胸襟識量所見者大方可謂之大臣朕觀諸臣中有器量小者見朕賞賜則欣喜不勝見於詞色夫受賞而欣喜若此則受罰必怨忿於心矣朕之賞罰悉出大公總視乎其人之自取受賞者當思所以致賞之由並思所以不愧乎賞之道則可以常保其恩賞受罰者當思所以致罰之由並思所以免罰之道則可以不至於再罰矣○己酉諭戶部朕

御極以來愛養黎元勤求治理各省錢糧耗羨原非應有本欲悉行革除因廣爲諮詢留心體察知州縣官員實有不得已之用度若將耗羨盡行禁止在廉謹之員實難支持而貪劣不肖之徒勢必藉口無以養廉恣意苛索百姓轉受其累是以錢糧之有火耗由來已久各處皆有相沿之例其數亦多寡不同惟應於火耗過重之員重治其罪若有司官酌量收納不加重苛取於民小民亦覺相安此各省之大勢也查各省之中賦稅最多者莫如江南之蘇松二府浙江之嘉湖二府每府多至數十萬兩地方百姓未免艱於輸將其賦稅加重之由始於明初洪武時四府之人爲張士誠固守故平定之後籍諸富民之田以爲官田按私租爲稅額夫負固之罪在士誠一人而乃歸咎於百姓加其賦稅此洪武之苛政也有明二百餘年減復不一我朝定鼎以來亦照明例徵收

蓋因陸續辦理軍需經費所在未便遽行裁減我 皇考聖祖仁
皇帝常論及此雍正三年朕仰體 皇考多年寬賦之 聖心將
蘇松二府額徵浮糧豁免彼時頒發諭旨甚明本欲一體加恩於
嘉湖二府因浙江風俗澆漓正須化導不便啓其望恩倖澤之心
故爾暫止今見浙俗漸次轉移改而遷善朕心深慰用沛恩膏查
嘉興府額徵銀四十七萬二千九百餘兩湖州府額徵銀三十九
萬九千九百餘兩俱著減十分之一二府共免銀八萬七千二百
兩有奇永著爲例至於浙省地方各官養廉之資更無別項而耗
羨每兩不過五六分以通省額徵之數計之每年耗羨僅十四萬
兩自督撫將軍副都統學政及藩臬道府同知通判州縣等官共
一百二十員凡用度公費皆取資於此似不足支應除嘉湖二府
錢糧已經減免外著將杭州甯波紹興台州金華衢州嚴州温州

處州等九府額徵銀二百五萬兩按十分之一內存半計算銀十萬兩賞給各官以爲養廉合之州縣耗羨則有二十四萬兩從雍正六年爲始俱著提解司庫令該撫酌量官職之大小府州縣地方之繁簡秉公派定數目奏聞餘銀存爲本省公事之用朕軫念浙省官民施恩格外百姓賦稅之稍重者則將額徵之數特賜裁減官員用度之不足者則將惟正之供賞給養廉朕之施恩於官者實施恩於民之意無非欲百姓等催科不擾皆樂業於田間官員等俯仰裕如咸盡心於官守儻官員不知副朕愛民之苦心仍有作姦犯科隱構逋賦及侵漁公帑剝削民膏者在天理國法俱難姑容加以重懲更無可貸思之慎之○以莽鵠立署陝西甘肅巡撫由禮部右侍郎署○雲貴總督鄂爾泰奏威遠新平裸賊倚恃深山密箐專以刦殺爲活從前雖屢經用兵緣兇頑難以遽擒或反代

爲容隱由來已久比鎮流蠶動二處裸賊遂乘機聚眾焚掠鄉村
臣隨飭征勦鎮沅各路勝兵一鼓擒剿見獲威遠賊首扎鐵匠新
平賊首李百疊等餘黨就撫得旨裸賊倚恃險阻肆行不法爲害
地方鄂爾泰檄令各路官兵乘機剿撫兇犯成擒地方從此甯謐
甚爲可嘉著交部議敘總兵孫宏本奉該督調度實心效力勞績
懋著著從優議敘烟瘴地方又值炎暑官弁兵丁奮勇效力皆屬
勤勞著從優議敘賞賚其中有染病受傷以致身故者俱照陣亡
例一體恩卹

十一月癸丑朔命四川陝西雲南各遣兵進藏以左都御史查郎
阿副都統邁祿經理一應軍務○甲寅諭內閣延信已犯重罪革
去貝勒交與宗人府究審著行文與富甯安卽將伊家產查明看
守其家屬人口著派官兵解送進京○乙卯諭吏部定例凡在京

各部院官員因病告假回籍調理者病痊之日仍以原衙門補用至在外各官一經告病卽令休致所以防不肖有司之託病規避也夫外官有地方之責患病不能辦事自應呈請離任但病痊之日格於成例雖有才具優長之員不得起用殊爲可惜從前存府縣官員告病者朕降旨調來引見見其才尙可用卽命醫調治痊可仍行補用誠以人才難得雖片長薄技不忍棄置也嗣後外官告病者著督撫查明確實具題令回籍調治痊可有情願起用者於本籍起文赴部引見仍以原缺補用如此則可以杜規避之端而人才亦不至於淪棄矣○丁巳諭內閣戶部侍郎西琳著補授西安巡撫張保著回刑部侍郎原任常德壽到京時著署理戶部侍郎事務浙閩總督高其倬辦理兩省之事才力少不及李衛著授爲浙江總督管巡撫事從前鄂海楊琳爲總督時因不能兼攝

兩省之事是以曾用年羹堯爲四川總督孔毓珣爲廣西總督總之酌量時勢因人而施也今李衛亦照此爲浙江總督不爲浙江定例○命法敏傅德辦理阿爾泰軍糧屯田事○以科爾沁敖漢等處秋收歉薄發帑九千兩賑之○戊午江西巡撫布蘭泰參奏原任撫標遊擊今升蔚州參將裴魁從前虛冒馬糧二分步糧三分守糧六分今經查出請革職究追得旨武弁虛冒糧餉幾分乃歷來積弊較有司之貪贓枉法累及國計民生者似有分別該上司等應豫行嚴飭令其峻改爲國家愛惜人才若切加訓誨仍不遵奉則當參革治罪今布蘭泰到任伊始尙未教導屬員遽以空糧幾分將裴魁參奏未免過刻若督撫等皆如此參劾恐有用之才受微愆之累而不得改過自新者多矣朕念裴魁從前效力從寬免其究問著降三級留任朕此番降旨將裴魁寬免深恐各省

武弁等剋扣兵糧而該管上司等徇情寬縱者由此漸多若照例將裴魁治罪則又恐各該上司以此事參處爲是因而刻意撿求使可用之員遽行黜革實屬可惜是以明降諭旨凡此寬嚴輕重之間朕實以至公之心而權衡於至當之理封疆大臣等祇遵朕訓隨事察理因時制宜遇屬員中之小過當加訓戒容其改悔自新方能事事合乎公平至當也○庚申諭內閣前據怡親王及大學士朱軾奏稱直隸水田稻穀豐收民間多不慣食稻米請發銀採買米石使得賣米價銀轉買小米高粱於百姓甚屬有益此特爲民食計非爲倉儲計也近聞州縣中竟有徧勒小民強買稻米者此等不肖官吏生事擾民將朕愛民德政奉行不善反爲擾民之事較之一切貪劣之員尤爲可惡著該督等查參治罪儘徇情隱庇不行查參將該督等一併嚴加議處○敕修八旗志書○壬

皮諫內閣朕日理萬幾勤思上治凡外省來京之小臣如州縣佐
貳等官常令引見並許條奏地方事務數年以來覽所奏甚多其
中指陳近理言有可採者或交部議或卽准行此皆朕留心政治
期有裨益於地方之意也特恐行之日久致生弊端或各省督撫
藩臬等見地方事務有不便自行陳奏之處因授意於屬員令其
寫人條陳之內亦未可定朕防微杜漸不得不豫行曉諭儻有此
等則顯蹈欺罔之罪一經發露斷不寬貸至朕屢頒諭旨訓勵臣
工總爲國計民生之至要各省督撫諸臣自當實心遵奉但恐前
任督撫所奉之諭旨接任者未曾備悉或致日久廢弛著各省督
撫等將歷來所奉諭旨俱繕錄成冊一一詳載以便每日觀覽觸
目儆心並將此冊交代不許失漏藏匿如此則前任奉行之諭旨
後任仍得知所遵循觀覽之際悉如親承朕訓於國計民生庶有

裨益○諭朕覽明太祖所著洪武寶訓一書詞義周詳誥誡諄切所以教其子孫臣庶者亦費苦心但明太祖起自布衣奄有天下雖資性過人而其識見尙局於卑隘其規模未臻於廣大蓋緣文過其實言行多不能相符而議論自相矛盾者有之朕觀堯舜授受心法惟有一中治世之道必事事合乎時中始爲至善我太祖太宗世祖聖祖相承之神謨聖烈合於大中至正之道者已經敬輯聖訓垂爲世法而從前史冊所載歷代帝王之舉動言論每於中道之權衡或未能悉協大抵由於時勢之所值不同故政治訓辭亦因之而有偏向後之論者遂不能無疑議於其間朕意欲將經史所載歷代帝王之嘉言懿行可以紹執中建極之心傳者採錄成書爲後世子孫之法鑒者著派翰林官分任纂修陸續進呈朕親加酌定○丁卯諭內閣昔聖祖仁皇帝嘗稱

巴圖魯公鰲拜效力處甚多厥功甚大因犯重案不得已將伊治罪伊孫達禮善朕甚望其成立欲加恩育但伊人甚平常行止不堪可惜不能承朕恩眷當時諭旨如此朕數十年來惟聞鰲拜僭妄無禮擅權作威之罪未深知伊之功勳並不知鰲拜子孫見在者何人昨引見達福時方知達福人去得朕又恭閱聖祖仁

皇帝實錄鰲拜所效功績每多超眾之處是以康熙五十二年

聖祖特命查鰲拜之子孫加恩賞給一等阿思哈尼哈番皇考既已施恩寬免鰲拜之罪應將鰲拜效力所得一等公爵給達福承襲世襲罔替仍授爲散秩大臣鰲拜著致祭一次至建立石碑加恩等處交該部查例具奏○戊辰雲貴總督鄂爾泰奏黔省邊界生苗不納糧賦不受管轄隨其自便無所不爲由來已久臣自勦撫長寨後生苗目視長寨苗戶安居樂業各思投誠內附長寨

後路克猛等處及馬頭山松把廣順州定番州古羊山外等處招撫化誨夷苗共一百八十四寨一千八百餘戶俱聞風嚮化並獻弓弩盔甲雖區區頑苗頑獠不啻犬羊芟夷土夷糧何增毫末但念其原無統轄遂任彼擾害邊疆欲行稽查無從蹤迹縱思撫卹末由招安今仰賴 聖主聲教所訖莫不願附版圖但戶口必須編造錢糧自應從輕且夷民半無姓氏名字雷同應行更定姓名彙冊報部酌爲額賦案年輸租庶幾邊境長甯夷民永賴得旨苗民梗化由來已久況屬生苗尤難懾服綏靖鄂爾泰勦撫並用威惠兼施俾生苗等嚮化輸誠咸願納賦歸附版籍又謬沖逆苗等素稱獷悍難馴今勦撫已靖悉皆內嚮鄂爾泰辦理甚屬可嘉著由拜他喇布勒哈番加授一等阿達哈哈番世職以獎勞績張廣泗遵依鄂爾泰調度實心出力著交部從優議敘在事官兵應

如何議敘賞賚之處著鄂爾泰分別具奏○庚午理藩院遵旨議覆澤卜尊丹巴胡土克圖請加封澤卜尊丹巴喇嘛遣官齋捧敕印送至喀爾喀庫倫地方得旨澤卜尊丹巴胡土克圖與班禪額爾德尼達賴喇嘛之後身出處甚確應封於庫倫地方以掌釋教朕爲普天維持宣揚教化之宗主而釋教又無分於內外東西隨處皆可以闡揚昔達賴喇嘛與班禪額爾德尼在西域時其居住青海之厄魯特顧實汗等實與之鄰近相與護持故其教盛行於西藏自此各部落俱爲檀越踵而行之有年矣蓋宣揚釋教得有名大喇嘛出世即可宣揚豈僅在西域一方耶澤卜尊丹巴胡土克圖其鍾靈原有根源乃與達賴喇嘛班禪額爾德尼相等之大喇嘛也故眾喀爾喀俱尊敬供奉之且伊所居庫倫地方弟子甚眾著動用帑銀十萬兩修建大剎封伊後身俾令住持齊集眾喇

嘛亦如西域講習經典宣揚釋教再多倫腦兒地方乃眾喀爾喀
歸順時我 皇考巡狩於此眾喀爾喀齊來朝覲會盟之地也應
造寺宇以表彰之俾出世之張家胡土克圖居住張家胡土克圖
者西域有名之大喇嘛也唐古特人眾敬悅誠服在達賴喇嘛班
禪額爾德尼之上各處蒙古亦皆尊敬供奉今其後身稟性靈異
確實可據著將多倫腦兒地方寺宇亦動帑銀十萬兩修理寬廣
使張家胡土克圖之後身住持於此齊集喇嘛亦如西域講習經
典以宣揚釋教蒙古汗王貝勒貝子公台吉等既同爲檀越朕如
此推廣教法建造寺宇一如西域令喇嘛居住講習經典於伊等
蒙古之誦經行善亦甚便易蓋禮佛行善無分遠近宣揚釋教之
處愈多則佛法可以日廣卽澤卜尊丹巴胡土克圖張家胡土克
圖皆前世達賴喇嘛之弟子伊等豈肯忘其宗派耶○戶部等衙

門議覆四川巡撫憲德奏各府州縣增設裁改事宜一成都府請復設華陽縣添知縣典史教諭訓導各一裁府屬之稅課大使一請改資縣爲直隸資州管轄仁壽資陽井研內江四縣裁資縣原設之典史一改縣州爲直隸州管轄德陽安縣縣竹梓潼四縣其威州應裁併入保縣管理改茂州爲直隸州兼轄汶川保縣二縣及各土司一請裁馬湖府其知府經歷教授各一俱裁將馬湖府原屬之屏山縣歸併敘州府轄其敘州府通判請移駐馬湖府管束雷波等各土司從之○辛未署湖廣總督福敏奏勦撫諺沖花苗巢穴已焚接獲男婦見在解密官兵俱撤回原汛得旨花苗地連黔楚素行不法爲害地方今福敏會同勦撫楚地從此無兇苗之擾甚屬可嘉福敏著交部議敘其在事官弁兵丁應如何議敘賞賚之處著福敏分別具奏○癸酉兵部議覆盛京偷採眾犯

私越邊口往朝鮮地方行兇不法據該國王李昉咨報皆由守口官弁廢弛徇縱所致除將失察之該管官革職拏審外嗣後應嚴行查禁儻守口官不驗明印票任其出入者該將軍督撫提鎮題參交刑部嚴行治罪得旨依議著該管之將軍督撫提鎮等實力奉行嗣後儻有越境生事者定將該管各官從重議處再者昔年聖祖仁皇帝頒諭朝鮮國王儻有盜賊前往伊國劫掠著該國王卽行追拏殺戮生擒解送自朕卽位以來又降諭旨若颶風船隻人內有無票妄行生事者該國王卽照伊國律例懲戒治罪屢降諭旨甚明今內地盜竊之輩因各處捕緝禁約甚嚴無處可以藏匿是以潛逃外國苟且偷生該國王旣列藩封當爲朝廷盡捕盜安民之職乃柔懦不能遵奉轉使內地犯法之人恃朝鮮以爲潛蹤避罪之地此風斷不可長嗣後儻有匪類越境生事而朝鮮

不能擒獲以致漏網者著該國王將伊國防汎之員題參治罪該部將該國王一併議處以爲藩王不能遵旨奉行捕盜安民者之戒著將此文與朝鮮國王知之○甲戌常保綠事降調以通智爲盛京工部侍郎由大理寺卿遷○賜王元浩等一百十六人武進士及第出身有差○乙亥宗人府議奏閒散宗室廣善蒙恩賞給公銜在 陵寢居住越分請安請革去公銜以閒散章京看守 陵寢大學士蕭永藻不行攔阻聽其請安應革職得旨廣善著革去公銜在閒散章京之列行走蕭永藻向來操守甚好伊恃其操守驕矜偏執諸事任意在 聖祖仁皇帝時並無實心效力之處及朕卽位因其年逾七旬爲舊日大臣加恩優待念 景陵事務關繫重大特命伊一切總理且令伊得就閒散之地以頤養暮年正所以善全之也乃伊不知感朕之恩且以朕不加任用時懷怨望之

意自到 陵寢以來事事推諉瞻徇不肯實心辦理卽如筆帖式等強奪民人之牛隻而伊不行約束小人偷鋸 陵寢枯樹而伊不知察訪貝勒允禩到 陵行禮而伊不行齊集其餘如請安來京不候旨卽去似此疏慢之罪甚多不可悉數惟知阿諛允禩以長其傲慢狂肆之罪而其特行條奏者則裁汰舊設之官員減去祭祀之乳牛以爲節省錢糧之計不知大體負恩廢職肅永藻著革職仍在 陵寢地方居住效力○丙子諭諸王大臣等朕每恭讀 聖祖仁皇帝實錄必虔加頂禮然後展誦每遇 聖祖尊號必頂禮致敬不敢平視此朕居敬存心不待勉強非獨一事爲然也聖人戒愼恐懼之功無間須臾時時收斂此心便是敬稍或不敬則此心縱逸而不可追矣凡人動怒之時或與人相爭之時心尤易縱切須以敬自持果能操存涵養不但是聖賢修己工夫亦

可得養生之道不可不加之意也爾等每聆朕諭旨聽受之下中心誠服在爾等斷無面從背違之習然恐存此成見或中心以爲是未必果然全是也設爾等陳奏之言朕或誤以未當者爲當其失僅在一事所繫猶小若朕所發諭旨爾等漫以未盡善者爲盡善其所繫不綦重乎嗣後切須爲朕存心致思詳加體認不可稍有遷就迎合之意使朕有失言過舉朕於爾等有厚望焉○丁丑諭八旗都統等歷來滿洲人材壯健弓馬技勇罕與比倫前令八旗查得親軍護軍內能開八箇力以上硬弓者見有一萬八千餘人昨朕在瀛臺考試天下武舉騎射之後令八旗人等當眾人之前校射伊等所用之弓自十八箇力以至十二箇力不等舉重若輕從容合度眾武舉等咸驚異以爲從來罕覩朕心甚爲嘉悅著分別賞給銀兩伊等藝勇超羣是其盡心學習之所致嗣後務須

更加勉勵演習熟練不可以弓力相爭尙將此通諭八旗知之○
戊寅諭刑部凡強盜拒捕將官兵傷死之案除同夥傷人之時該
犯不在一處者仍照例議罪外其同在一處或三五成羣雖非下
手之人既在旁目覩卽係同惡相濟法所難寬嗣後應照舊例立
決向來各省督撫於命盜案件或稱酒後殺傷或稱饑寒所迫巧
爲開釋是皆婦寺之仁未聞聖賢之義者夫酗酒之徒已非良善
況恃酒致傷人命更屬兇殘今不因酗酒而加其罪反因酗酒而
寬其罪恐奸惡之徒借麴蘖迷心之名以肆其兇暴殺人之計流
弊固無窮矣至迫於饑寒之說在老弱之人容或有之然爲盜賊
者必係年力强壯之人耕種傭工何事不可資生餬口乃喪心滅
理甘蹈刑戮而不顧乎蓋良善之人雖遇饑寒亦斷不爲盜兇惡
之人不必饑寒而後爲盜其理顯而易明凡爲封疆大臣者豈可

不察情理而姑息以養奸乎朕代天以出治督撫受職以理民兇暴在所當懲良善在所當恤所謂天命天討也一夫不獲其所實吾君臣之責儻無辜之民不能保護而安全之而使之有轉徙流亡者此必水旱之不時積貯之未備地利之未興科派苦累之未革實朕與該督撫經理失宜而使斯民罹於困厄也清夜捫心應如何抱慚負疚若坐視百千良善之失所而不生惻隱之心轉於兇暴殃民之盜賊加之憐憫欲枉法以保全之豈非賞罰顛倒重負父母斯民之責耶朕儆惕之切無一時稍釋於懷願天下督撫臣工咸體斯意○庚辰諭內閣聞向來常有演習拳棒之人自號教師召誘徒眾鼓惑愚民此等多係游手好閒不務本業之流而強悍少年從之學習廢弛營生之道羣居終日尙氣角勝以致賭博酗酒打降之類往往由此而起甚且有以行教爲名句劫盜竊

賊擾累地方者若言民間學習拳棒可以防身禦侮不知人果謹遵國法爲善良尙廉恥則盜賊之風盡息而鬪訟之累自消又何須拳棒以防身乎若使實有膂力勇健過人何不學習弓馬或就武科考試或投營伍食糧爲國家效力以圖榮身上進豈可私行教習誘惑小民耶著各省督撫轉飭地方官將拳棒一事嚴行禁止如有仍前自號教師及投師學習者卽行拏究庶游手浮蕩之徒知所儆懼好勇鬪狠之習不至漸染而民俗可歸於謹厚矣○戶部議覆川陝總督岳鍾琪奏川省欺隱田地請遴選賢能司官前往查丈應如所請於各部司官並候補候選州縣內揀選引見命往如有奸民脅眾阻撓者按律治罪得旨此本內但稱奸民阻撓公事按律治罪而百姓實有冤抑下情如何准其陳訴之處未曾議及著通行曉諭丈量案內百姓果有冤抑下情准其控告該

督撫欽差官員秉公審理儻所控虛妄將本人照誣告者加等律

治罪所請丈量地畝人員著於小京堂科道內揀選並令各部堂

官保送一併帶來引見其帶往丈量人員著於庶吉士見任主事

內閣中書中行評博候補候選人員內揀選引見○宗人府議奏

順承郡王錫保徇庇黨與並不將延信大不敬之事參奏又將不

能騎馬之章京派拏延信以致遲誤應將錫保王爵並管理宗人

府事務一併革退圈禁家中得旨錫保革去王爵及圈禁之處俱

從寬免其特恩賞給之親王俸祿護衛官員俱著撤回仍罰郡王

俸三年○調祖秉圭爲廣西巡撫以沈廷正爲貴州巡撫趙國麟

爲福建布政使由長蘆鹽運使遷○黃叔琬緣事降調以郭洪爲廣西布

政使張元懷爲廣西按察使由洵史遷○實授赫勝額貴州布政使張

廣泗貴州按察使○以孫卓爲禮部右侍郎由通政使遷○實授莽鵠

立陝西甘肅巡撫○是月免湖北蘄州黃岡公安石首荊左荊右

等州縣衛浙江安吉仁和等州縣杭州前右二衛水災額賦有差

十二月壬午朔諭諸王大臣等親王及旗下大臣部院大臣內務

府總管等在乾清門外辦事所有跟隨之人並無限制以致人數

眾多頗覺繁雜爾等查例議奏尋議親王以下宗室公以上如進

內禁門帶護衛一員部院大臣等帶筆帖式一員旗下大臣等帶

印房筆帖式或領催一人又乾清門侍衛人等出入景運門隆宗

門後右門俱照例投職名查驗在內行走之王等亦得在隆宗門

出入其餘俱令在後左門出入從之○以兵部右侍郎那蘇圖爲

黑龍江將軍○甲申刊刻孝經小學清漢文告成 御製序文○

乙酉諭禮部直省拔貢舊例十二年題請舉行一次後因各省學

政不能秉公選取國子監未便照例請行於雍正元年特行一次

朕思各州縣每年歲貢較其食廩淺深挨次出貢內多年力衰邁欲得人材必須選拔著各省學臣於科考時照例府學拔取二名州縣學拔取一名甯缺勿濫務取學問優通品行端方材猷可用之人令其來京朕將親加考驗令入國子監肄業如有學問荒陋人品不端才具庸劣者將該學政嚴加議處嗣後六年選拔一次國子監屆期題請候旨○丁亥諭大學士九卿等爲治之道首在得人朕臨御以來夙夜孜孜廣爲諮訪期得人材以理庶政而內外臣工所保舉之員其中秉公推荐足備任使者固不乏人而徇私濫舉及苟且塞責者亦復不少朕思荐舉人材關繫國家辨材論官之要道舉得其人則政事無不就理舉非其人則流弊從此而生孟子曰立賢無方孔子曰舉爾所知觀聖賢之言則知得人之道宜廣其途以爲揀羅而各舉所知庶可以收克知灼見之益

也今特諭內外諸臣等京官自翰林科道郎中以上外官自知府道員學政以上武職自副將以上旗員自參領以上皆令各舉一人滿洲官員則保舉滿洲漢軍官員則保舉漢軍漢人官員則保舉漢人文職官員許保武職武職官員許保文職於滿漢文武內或係見任職官或係候補候選之人或係進士舉人貢監生員或係山林隱逸務期有猷有爲有守品行才具足備國家之用者各人密封奏摺赴奏事人員處轉奏外官則遣家人齎送密摺來京付奏事人呈進卽或親戚子姪等亦可據實薦奏不必以嫌疑引避但京官自尙書侍郎外官如督撫提鎮兩司皆係朕已經深知簡任者不必入所薦之列其奏摺內止開列本人官銜姓名註明所薦之人官銜考語不必引頌聖繁文此朕旁求俊乂之苦心冀賢才輩出師濟盈廷俾百職得宜庶務畢舉凡有保舉之責者不

得瞻顧私交不得受人屬託不得互相商議不得輕聽風聞夫十室之邑必有忠信凡人生平豈無一人熟識深知者况既列朝紳受國家之爵祿而朕又推心置腹畀以舉薦賢能之美事儻猶有懷藏私意濫舉非人者清夜捫心尚可以爲人乎且朕之觀人往往洞見隱微將來觀所舉之人卽可知舉人者心術之公私識見之明昧亦不使諸臣之得行其私也○諸王大臣等密奏延信罪狀二十款查延信向與阿其那阿靈阿拉錫普奇等結納黨援之罪一奉旨詢問年羹堯之處並不據實揭報黨援之罪二在西甯時陰與允禔交結黨援之罪三及復令其進藏時鎖營年羹堯代伊解釋保奏黨援之罪四延信原係阿其那阿靈阿蘇努等同黨奉旨交問伊身爲將軍員勒明知其事反將無干之漢人路振揚舉出黨援之罪五遵奉阿其那傾心效順稱阿其那樸實稱阿靈

阿爲人傑將伊女與阿爾松阿結親黨援之罪六捏造逆言告知
年羹堯希脫黨謀黨援之罪七當 御前昂然伸足大不敬之罪
一 皇上諭旨訓責坐聽不跪聆大不敬之罪二時屈 萬壽聖
節不俟慶祝驀自起程回任大不敬之罪三在西甯時不遵諭旨
將地方要務並未奏聞一事大不敬之罪四假捏病狀扶杖行走
及令伊署大將軍印務棄杖前往欺妄之罪一諭旨訓練士卒不
行欽遵反懷怒望將士卒混行痛責擾亂國政之罪一奉旨詢問
應否進藏之處並不實心籌畫但云路有烟瘴希圖惑眾擾亂國
政之罪二在將軍任內不親加訓練止圖宴逸負恩之罪一妄行
保題官兵一百九十餘人市恩邀結人心之罪一在甘州時因青
海用兵亂行調動遠處兵丁幾致可危失誤軍機之罪一身爲將
軍聞賊寇臨邊並不發兵迫新城子失陷之後始行發兵失誤軍

機之罪二將拏到逆賊阿拉布坦温布屬下蒙古七人並不究審
竟行釋放失誤軍機之罪三進藏時將國帑十萬兩入己貪婪之
罪一以上罪案延信俱自認不諱請按律斬決以彰國法妻子發
往右衛財產入官所屬佐領下人等交該旗辦理得旨延信從寬
免死者與隆科多在一處監禁伊子不必革去宗室凡閒散宗室
原有在王府佐領兼轄之例伊等著著入顯親王府佐領管轄驅使
至伊屬下佐領人等原從顯親王家下分出仍著賞與顯親王家
產不必入官伊有種種貪賊虧缺銀兩著將伊家產交與旗下大
臣等查明還項○乙酉諭八旗大臣凡獲罪革職之人經朕復加
錄用卽無罪矣嗣後承襲之時照常將伊等之子開列著爲例○
壬辰內閣等衙門遵旨議覆河南總督田文鏡條奏盜案各款一
事主捏報強盜如以姦情人命鬪毆等事捏報盜案本身無罪者

分別議杖本身有應得之罪者從重治罪若憑空捏報照律問遣
甲長鄰右扶同捏報者照事主減一等治罪應如所請但捏報既
定嚴例或事主已經據報而有司抑勒諱盜改強爲竊者除將地
方官照例革職處分外該管各上司及督撫均應分別降調一呈
報盜案責令州縣正印官會同營汛星往事主家查勘情形訊供
填報如州縣官不親詣查驗捏作親詣者革職該管官照徇庇例
議處應如所請一正印官公出不及查勘卽令佐貳官申請鄰邑
正印官代驗查地方佐貳捕官原以備地方之事若正印官公出
應令佐貳捕官會同營汛星速代驗如查驗不實照正印官處分
得旨盜案逾限不完卽行參處原爲官役弛縱而設若因限期迫
促致有枉拏平民栽贓買贓教唆口供扳累無辜請弊甚非清理
盜案之道嗣後果有虛實情形未分盜贓未確限內不能完結承

審官應如何詳報上司應如何報部展限之處另議儻有將易結之盜案不行速結濫請展限該督撫漫爲咨部經部駁查者應將該督撫及該有司如何處分之處亦著詳議又議稱凡報盜案責令州縣正印官會同營汛星往事主家查勘情形所以防事主狡飾之端也夫事主之強悍者或以竊報強柔懦者或以強改竊固有狡飾之情至於地方文武官員因畏疏防承緝處分恐嚇事主抑勒改供亦未可定如有此等不肖官吏應作何處分之處亦著詳議又議稱初報盜劫正印官公出應令佐貳捕官會同營汛速驗但佐貳捕官未可深信如遇失事而正印官公出佐貳捕官一面會同汛弁查驗先行緝捕一面申請鄰邑印官至事主家覆加查驗尤爲詳慎應如何定例之處俱著詳議具奏尋議嗣後盜案果有虛實情形未分盜賊未確限內不能完結者該管上司覈明

報部准其展限四箇月儻承審官將易結之盜案濫請展限者革職該管官及督撫分別降罰至地方文武官員因畏疏防承緝處分抑勒事主改供者革職再地方失事印官公出應令佐貳捕官一面會同汛弁查緝一面申請鄰邑印官覆驗如鄰邑印官推諉附會者照徇庇例降調餘俱如前議行從之○癸巳諭八旗大臣旗員以習武爲要卽文職亦不可棄若將弟兄子姪帶赴外家口旣多如何能爲廉吏而子弟但能倚仗勢力無所不爲擾害百姓最爲惡習漢軍內不得人材皆由於此也年幼者隨任猶可十八歲以上理應留京令其披甲學習馬步弓箭與國家出力如可以習文者送赴官學讀書著將外省旗員帶族人赴任所之處永行禁止儻係親子十八歲以上欲帶赴任所者著具呈該旗大臣請旨再旗人不應作外省驛丞典史等雜職漢軍內壯丁多之佐

領添編佐領或在直隸綠旗營當兵俱著會同吏兵二部定議尋議滿洲蒙古漢軍凡補授外任者嗣後俱不准其將十八歲以上之子弟隨任見在帶往者應撤回該旗當差學習至旗人補用外任文武雜職亦應永行停止漢軍閒散人丁有情願入綠旗者該旗咨部轉送直隸總督造入民籍准選爲綠旗兵行走得旨外省旗員見在隨任子弟姑免調回其文武雜職等官俱著回旗如有該督撫提鎮等保留者准其留任○甲午準噶爾台吉噶爾丹策零遣使臣特磊來朝頒敕諭一道令使臣齎回諭曰據奏知爾父病故不勝惋惜爾父在時將一切事務未得裁處妥協台吉知爾父負朕之恩爲非遣使遠來朕甚嘉之方今西藏地方噶隆阿爾布巴等與頗羅鼐等彼此結讐舉兵相拒朕正在躊躇爾奏稱欲在西藏煎茶設供廣行釋教以安眾生似屬非分準噶爾乃西北

隅一小部落耳釋教之廣行與否豈闕爾之前茶設供朕卽位元年爾父奏稱寬宥伊罪言詞恭順朕以爲出於至誠故欲清理疆界乃命使二次爾父反生嫌疑不能遵奉朕旨再羅卜藏丹津乃青海和碩特扎什巴圖爾之子伊骨肉中無故弄兵互相殘害朕差大臣前往命各息兵而羅卜藏丹津乃敢悖我 皇考聖祖養育之恩負朕之德侵犯內境被守邊輕兵擊敗遠行逃竄爾父應卽爲擒獻始見和好之誼乃於本地隱匿窩留是何意耶由此觀之從前所奏無一誠實之處可知矣前者羅卜藏丹津乃一愚戾不忠不孝之人爾父年高歷練力能將伊酌量裁處可以生之亦可以制之必不被伊愚弄是以不曾勒追今爾年少與彼相等以羅卜藏丹津之志氣高傲不顧恩義斷不肯屈於爾下守分安居必將離間爾等於爾大有不便爾務須將羅卜藏丹津送來朕念

伊父扎什巴圖爾從前勞績斷不將伊誅戮仍施恩養爾其祇

遵朕命爾台吉應將利害輕重盡心籌畫自立主見特茲敕諭○

丙申以張允隨爲雲南布政使趙宏本爲雲南按察使由貴州貴東道遷

○以納海爲河南按察使由郎中遷○戊戌左都御史沈近思卒遣平

郡王福彭往奠賞治喪銀五百兩予祭葬諡端恪贈禮部尙書太

子少傅廕一子入監讀書○己亥諭內閣吳淞石塘當日勘估時

於海潮紆緩之處酌量修築土塘蓋因工程浩大節省錢糧起見

但東南財賦之區灌溉田畝保聚室廬全賴海塘捍衛朕思海勢

衝激風濤旋轉難定土塘經歷年久未免可虞不若一例改築石

塘爲百姓萬年之利著該撫確行勘估不得惜費省工苟且塞責

務期堅固永垂久遠以副朕經理海疆愛養民命之至意○諭兵

部向來雲貴川廣以及楚省各土司僻在邊隅肆爲不法擾害地

方剽掠行旅且彼此互相仇殺爭奪不休而於所轄苗蠻尤復任意殘害草菅人命罪惡多端不可悉數是以朕命各省督撫等悉心籌畫可否令其改土歸流各遵王化此朕念邊地窮民皆吾赤子欲令永除困苦咸樂安全並非以煙瘴荒陋之區尙有土地人民之可利因之開拓疆宇增益版圖而爲此舉也今幸承平日久國家聲教遠敷而任事大臣又能宣布德意勦撫兼施所在土司俱已望風歸向並未重煩兵力而願爲內屬者數省皆然自此土司所屬之夷民卽我內地之編氓土司所轄之頭目卽我內地之黎獻民胞物與一視同仁所當加意撫綏安輯使人人得所共登衽席而後可副朕懷也但地方遼闊文武官弁需員甚多其閒未必盡屬賢良之輩且恐官弁等之意以爲土民昔在水火今旣內附已脫從前之暴虐卽畧有需索亦屬無傷此等意見則萬萬不

可著該督撫提鎮等嚴切曉諭不妨至再至三且須時時留心訪察稍覺其人不宜苗疆之任卽時調換並嚴禁兵丁胥役生事滋擾務俾政事清明地方甯謐安民樂業共享昇平儻有不遵朕旨絲毫苛索於土民地方者著該上司立卽參劾重治其罪卽係平日保舉之人亦不可爲之容隱果能據實糾參朕必宥其失察之愆嘉其公忠之誼該督撫提鎮等可共體朕心各盡懷保邊民之道

○庚子調圖理琛爲兵部右侍郎以舒楞額爲吏部右侍郎

由副

部統

○戶部議准署兩江總督范時繹奏丁隨糧辦最爲均平良

法請以雍正六年爲始將江蘇安徽各州縣應徵丁銀均攤入地畝內徵收從之○戶部議准廣東總督孔毓珣奏廣東廉州府欽州西北地名三不要與廣西之上思州安南之河口接壤既不屬欽州上思州管轄亦不屬安南地界故名三不要查此地與廣東

龍門協相近請併歸欽州以便就近撫綏而該地有三村曰白雞
白鴿白灘又有土名曰北崙最爲險要請於龍門協派撥千把兵
丁設汛防守巡遊彈壓從之○署兩江總督范時繹奏江南太倉
州鎮洋縣境內劉河鉅工已蒙發帑開濬而七浦一河原係民田
該地士民情願自行開濬業戶給費佃戶出工不敢再費帑金候
旨遵行得旨君民原屬一體民間之生計卽國計也儻遇國用不
敷之時勢不得不資藉於民力今國用充足朕爲地方籌畫萬年
之利不惜多費帑金興鉅工養育百姓若仍用民力以辦公事非
朕本心也況小民效力工程或致荒其本業而又不免官吏之督
催煩擾朕心實爲不忍若仍動公帑辦理仍將朕旨徧行曉諭該
州縣士民伊等當體朕愛養元元之心於工程告成之後加意照
看歲歲疏濬防護俾地方永受其益則勝於目前之趨事赴功多

矣○擢納延泰爲理藩院額外侍郎

由理藩院郎中遷

○壬寅以唐執玉

爲左都御史轉嵇曾筠爲吏部左侍郎仍留河東副總河任調劉

師恕爲吏部右侍郎仍署直隸總督以錢以垵爲禮部右侍郎

由副都御史遷

○癸卯諭大學士九卿等人臣朋黨之弊最足以害人心

亂國政唐虞之世共工驩兜輩比周爲黨舜必寘之於法孔子曰

君子矜而不爭羣而不黨易經渙之四曰渙其羣元吉朱子謂上

承九五下無應與爲能散其朋黨之象則大善而吉是朋黨之小

人固自古帝王之所必誅聖賢之所垂戒其爲世道人心計誠深

且切也蓋人臣之道惟在公忠體國古之純臣公爾忘私國爾忘

家精白乃心鞠躬盡瘁念念惟知有君父事事惟知有朝廷雖一

己之身家且不服顧又何至有營私結黨朋比爲奸之事惟奸惡

之小人其心旣陰險狡詐忍於悖逆君父擾亂國政而其才又足

以籠絡要結使奸邪之輩盡入其黨遂成牢不可破之勢當日蘇
努阿靈阿鄂倫岱等同惡相濟結爲邪黨凡屬在朝臣工其庸懦
無能者則棄置之而於聰明才智之人或動之以利或怵之以害
或震懾之以權勢或誘惑之以美名使其人不得不墮其術中彼
此固結日肆邪謀自以爲國家大事皆在其掌握操縱之中以此
煽惑人心擾亂國政若非我 皇考至聖至明乾綱獨斷則伊等
比黨之害可勝言哉朕在藩邸時知之甚悉故臨御以來將伊等
朋比爲奸之處屢次宣示中外蓋深爲世道人心 宗社國家之
計不得不痛加懲創嚴加誡諭惟冀大小臣工以伊等爲炯戒共
絕背公植黨之私時懷公忠體國之念則一德一心上下交而其
志同其於世道人心 宗社國家豈不深有利益哉○乙巳江蘇
巡撫陳時夏奏松江府華亭縣於十一月二十四日天降甘露樹

枝茅屋之上大如晶珠自辰至巳凝結不散父老歡慶奇祥合行
奏聞得旨頻年以來屢蒙 上蒼垂賜休徵朕意但以封疆大臣
得人代朕宣化爲真瑞似此嘉穀甘露景星慶雲河清海晏之祥
朕實不敢以感召自居亦不敢以祥瑞誇詡於天下後世也爾等
當仰體朕意期共勉之慎之○陝西按察使兼管河東鹽政碩色
奏十月初三日起至十一月十一日止池鹽獻瑞不需人力自然
滋生多至七百餘萬斤悉皆顆粒盤簇味甘如飴迥異常鹽下部
知之○戊申諭工部向來漢軍得補河員凡經手一切工程修築
既不完固防守復多疏虞上下通同侵欺浮冒虛糜國帑甚至冀
幸隄工之衝決以遂其侵那開銷之私計種種弊端朕所洞悉今
總河齊蘇勒悉心釐剔一應工程整頓料理俱有成效凡屬河員
亟宜洗心滌慮痛改前非各自奮勉蓋河工關係運道民生河官

之責任較之他員實爲重大務須悉知利害殫心竭力若塗飾耳目苟且塞責經該督題參定加重處斷不能寬也著將此旨徧諭河員互相儆戒以副朕廑念運道民生之至意○是月免直隸雄縣水災額賦有差○是歲人丁戶口二千五百六十五萬六千一百十人又永不加賦滋生人丁八十五萬二千八百七十七田地山蕩畦地八百六十三萬六千二百九十一頃四十六畝有奇徵銀二千九百八十一萬五千二十一兩有奇米豆麥五百三萬一千一百七十石有奇草五百八十四萬七千三百一十八束茶三十一萬八千四百七十五引行鹽五百一十一萬九千四百八十六引徵課銀三百八十六萬四千七十八兩鑄錢七萬二千三百五十二萬八千有奇